

ROMANS

Lat Inan Paul.angan Ump Pam Wanch Aak Rome.angan Wun-Wuntan Al-Alantan

¹ Niiyalang, ngurp ngatharam aak Rome.angan wun-wunaniya, ngay Paul.ang lat inan umpang niiyanta. Nil Jesus.ang ngayang mi' work nungantan iiyāng, ngay yipam wik min God.antaman waa'āng niiyant. ² Aak keenkana nil God.angan prophetsantan waa'-waa' thant wik min Christ.antamana. Than prophetsangana lat ngench thayanang ngul umpin. ³ Nil God.angan nhengk nungantam Jesus Christ anman waa'-waa' thant, a' ngul-ngulana nil aak iikanakan wamp ngul, nil puk many aak-ngeey. Pam wuut mangk nungantamana King David anana. ⁴ Ngul-ngulana nil Jesus Christ.an mul wun, a' koyam mulaman eka — amanamana nil God.angan kan-kanaman meenath ngampar nil Jesus.an nhengk nungantama, a' niliya pam pi'an paththam ke' piip nungantam yimanangana.

⁵ Ngay puth ngangk kuupamang nungant God.ant, nil puth ngangk minangam iiy-iyanara. Nil God.an Jesus Christ.ant thaw work inan thee'ow ngathar. Ngay wik min Christ.antamana pam wanch yotamantana waa'-waa'āng, than yipam kan-kanam ngaantam-ngeeyayn nil Jesus.an pam nhengk God.antama, a' than yipam monkan-wak-wakayn nunang, pam wanch aak nath-nathan wun-wuntan, ⁶ a' niiyan thamp aak Rome.angan wun-wunaniya, nil God.angan niiyang ump pam wanch Jesus Christ.antam iiy-iyāna.

⁷ Ngay puth inan lat niiyant umpanga. Nil piip God.angan kaangk niiyang a' nil puth ump niiyang

pam wanch nungantam iiy-iiyāna. Ngay kaangk piip God.ang pul Lord Jesus Christ.angan ngangk minangam pi'-pi'owpul niiyang.

Ngay Nungant Piip God.ant Thankyou Thawang Niiyantam Yotamantamana

⁸ Ngay ka'athamana wik inan thawāng niiyanta: ngay aak wanttinakan iiy-iiyang-a, than pam wanchangan wik min anman waa'-waa'antan niiyanganiy, than waa'-waa'antan ngathar niiy Christ.an minaman monkan-wak-wakaniy nunang. Ngay puth nungant piip God.ant thankyou thawang niiyantam yotamantama, ngay puth nungantang Jesus Christ.antang anman nenchananga.

⁹ Nil God.an mee'miya ngay mee'-wuth-wuthanamang niiyantana ma'-yotamana, a' puth ngayaniya ngangk minangam work iiy-iiyang piip God.antana, wik min thant pam wanchantan waa'-waa'ang Lord Jesus Christ.antaman. ¹⁰⁻¹¹ Ngay nungantan mee'-wuth-wuthanamanga nganyang kuchow niiyant puth ngay iingkamang niiyantana, ngay kaangk niiyang thathānga, ngay yipam niiyangan wik min God.antaman min-min ma'-aath-aathāng niiy yipam thayanam iiy-iiyān God.antan. ¹² A' puth amanamana ngamp yipam ngangk thay-thayanathwump, an puth niiy wik God.antam ngangkangam pi'-pi'aniy, a' ngay yimanangana wik God.antaman ngangkangam inman pi'-pi'anga.

¹³ Niiyalang, ngurp ngatharam-ang, ngay ke' anman wamping niiyantana, puth ya'a. Ngay kaangk ma'-aathāng niiyang Jesus.an monkan-wak-wakān nunanga ke' ngay pam wanch wiy anangan ma'-aath-aathangan thanang aak thon-thonangan wun-wuntana. ¹⁴ Ngay mak ma'-aathāng thanang, pam wanch aak nath-nathan wun-wuntana, pam wanch townsangan wun-wuntana, a' pam

wanch kangkangan wun-wuntan; pam wanch wik thon-thonan thaw-thawantana, a' pam wanch kuchek waap min anangana, a' putha pam wancha wiy anangan kuchek waap min ya' anangan. ¹⁵ Ngayan puth kaangk wampāng niyant aak Rome.angana, wik min God.antaman waa'-waa'āng niyant thampa.

Nil Piip God.an Wuut Pi'an A' Thayan Paththama!

¹⁶ Ngay kan-kanam kaangk wik God.antaman thaa'-aath-aathāng thanang. Ngay puth ngul-nyaa' ke' wuning wik God.antaman waa'-waa'ang thant pam wanch wiyantana, ya'a! Nil puth piip God.an wuut pi'an a' thayan paththam a! Nil puth ngul kaa'-piichanathow thanang pam wanch anangan wik nungantaman ngangkangaman pi'-pi'antan. Than puth Jews al-alangan wik inangan ka'atham kanam ngeeyin, in yimanang ngulana than Jews ya' al-alangan ngul ngeey-ngeeyantana. ¹⁷ Puth lat ngench thayanangan waa'ana, “Than wee'-wee'anangana Christ.an ngangkangaman pi'-pi'ayn nunang-a, nil God.angan kan-kanam ngul kaa'-piichanathow thanang, a' than God.antang ngul wun-wunayn.” Nil God.ana kaangk ke' thathow way ngampan yumpanampa, nil kaangk ke'-ke'ama, niliy puth min-minam paththama. An puth ngampwey kaangka nil God.angan way ngamparaman kon-ngathowanan-a, ngamp puth kan-kanam ngaantam-ngeeyāmpan nil Christ.an pam pi'ana, nil ngampang ngul kaa'-piichanathow.

Than Pam Wanch Yotam Anangan Way-Wayam Paththam Iiy-Iiyantan

¹⁸ Than pam wanch wiy anangana way-wayam paththam iiy-iiyantana, than wik God.antaman kaangk ke'a, than thaampantan, kaangk ke' ngeeyayn thakan. Nil piip God.angan ngul meenathow ngampar nil kaangk

ke'-ke'am thathow thanan wayan iyy-iiyayna, nilan ke'-paal man kul wampan nungant. ¹⁹⁻²⁰ Puth nathpalman-a, pam wanchangan kan thathin yuk way min nil God.angan yump, puth inpalana, than kan thathantan nil God.an pam pi'an paththama, a' nilana kan-kanam God thonam anmana, wiy ya'a. Nungkway than ke'an thathiythan nunang-a, nilan mee'-engkanang iyy-iiyan thant nil wanttakan God.ana. Thanan puth ke' thawiythan, “Ngan puth ngoongk-ngoongkam nunang God.ana.” ²¹ Ya'a! Than puth God.an kan mee'miy nunang, thanan puth ke'am ngaantam-ngeey-ngeeyantan nunang nil wuut pi'an paththama. Than thankyou ke'am thaw-thawantan nungant ya'a, puth thanan way thakan ngaantam-ngeey-ngeeyantan, puth than God.an min-minam ke'am yippak thiichin nunang. ²² Than ke' kuchek waap min waa'-waa'wuntan thanttakamana, puth ya'a, than kuchek wayan anman iyy-iiyantant. ²³ Nil God.an min-minam paththama, nil ke' uthamiy, ya'a, ke' pam wanchan uthamanamp yimanangan ya'a, nil God.an nil-nila, ke' uthamiy, puth than pam wanchangana God.ana wantin nunang, ke'-ngul nunang. Than yuk ngeen-wiy thak yumpantan ke' pam yimanangan — wiyiya, ke' minh panch a' ke' thuuk yimanangan thampa. Thananiya yuk anangan ngul ngaantam-ngeeyantan thanang, God.ana ke'-ngul ngaantam-ngeeyantan nunang, ya'a.

²⁴ Anpalaniya, nil God.angan nungantakaman ngaantam-ngeey, “Yaa, mak way iyy-iiyayna.” Nil puth God.angana too want thanang ngula, anpalana than way-wayam paththam ngul iyy-iiyin, maarich thak ngul kee'-kee'in. ²⁵ Than yuk way min God.angan yump-a, anangan ngul thaa'-kuump-kuumpin thanang a' anman ngul monkan-wak-wakin thanang, yuk ngeen-wiy wayanang anangana, than puth gods kan-kanam

ya'a. Nil God thonam anman, nilam ngampang yotam inangan yump, puth than pam wanchangan ke'am ngul ngaantam-ngeeyin nunang, ya'a, man-mangkam thee'in nungant. Ngamp puth yotamang thaa'-kuumpamp nunang ngulakama! Yey, in kan-kanama!

²⁶ Yaa, anpalaniy God.angan ya' want thanang ngul, thanan puth way-wayam paththam iyy-iyyin, maarich thakan kee'-kee'in wanch wiyant ngul. Than wanch wiy anangan ke'-ngul pamantangan y wunin, ya'a, an thana than-wancham maarich kee'-kee'athwin, ²⁷ a' putha than pam anangana yimanangwey than-pamaman maarich kee'-kee'athwin, puth nanpala ya' wayathwin thant-takaman, than way-wayam paththam ngul iyy-iyyin mee' God.antangan.

²⁸ Than piip God.an kaangk ke' paththam ngaantam-ngeeyayn nunang nil kan-kanaman wuut pi'an paththama, puth namanamana God.angan ya' want thanang ngul, amanamana kuchek waap thanttamana kanam wayama, thanana way anman iyy-iyyin. ²⁹ Than puth maarich thak kee'-kee'in a' putha yangk mo'-mo'in may minhak thakana, than kaangk pam wanch wiy anangan wayathayn thanang. A' than ma'-yotam pam wanch wiy anangan ngangk-wayangam kalin thanang, putha wiy anangan mulathin thanang a' kul thakan pekwin, a' putha than mee'-thenchwin thanttakaman thaka, than pam wanch wiy anangan wik way thakan aak-ya'ang waa'-waa'in thanang. ³⁰ Than puth God.an nunang kaangk ke'-ke'am paththama, a' puth wiy anangan ngangk-wayangam kal-kalin thanang, a' ulp-ulpanang thak iyy-iyyin, thanan puth way anangan puth-putham ngul ngaantam-ngeeyin way yumpanakan, a' than kuchek-thayan ngul iyy-iyyin kaath piip thanttamakana. ³¹ Than-thanam ngul puy-puyam way-wayamin ngula,

a' than ke'am wik thanttaman pi'-pi'in wik thanaman thawin pam wanch wiyantan, an ya'a, a' thanan puth kul yaam pi'-pi'in thant wiyantana, than ke'am ngangk mamin thanang, ya'a. ³² Nil God.an wik thayan thaw than pam wanchang way inangan yump-yumpaynwey-a, nil an ep aak umpuyangam aak wayak kuchow thanang. Than wik nungantam inangan mee'miy, puth ya'angam, than way-wayam paththam iyy-iyyin a' puth thawin thanttakaman thamp than pam wanchangan wayan yump-yumpantan-a, an ke' min iyy-iyantana, an ya'a, an than pam wanch way-wayam paththam iyy-iyantana.

2

Nil God.angan Ngulana Aak Way Aakanakan Kuchow Thanang Than Pam Wanch Anangan Wayan Yump-Yumpantan

¹ Puth niyy wik inan ngeeyān a! Niiy puongk wiyanganiya, niyy pam wanch wiy anangan waa'-waa'aniy thanang, ngul an kan-kanam ey? Niiy wee'-wee'anangana waa'-waa'aniy thanang pam wanch wiy anangan-a, puth niyy thampang wayan iyy-iyyaniy-a, an ke' niyy niyantakam waa'-waa'wuniya. Niiyan puth ke' thawin ke' niyy ngoongk-ngoongkam niyy wayan yump-yumpaniya. ² Puth ngamp mee'miy an kan-kanama nil God.angan ngulan aak way aakanakan kuchow thanang than pam wanch anangan way anangan yump-yumpantanana. ³ Puth niyy wiyangan pam wanch wiy anangan waa'-waa'aniy thanang puth niyy thampang pam wanch wayanang iyy-iyyaniy. Niiy ngaantam-ngeeyaniy ke' nil God.angan niyang thampang ke' kuchiy ey? aak way aakanakan ey? An ya'a! Nil niyang thamp aak wayakaniy kuchow a! ⁴ Nil God.an ngangk min iyan ngampar, nil man kul

erkam ke'am wampam nungant, ya'a, puth niy wiyangana, ke'am ngaantam-ngeey-ngeeyaniy nunang, ya' anman, kon uth anman iyy-iyaniy a! Niy ke'am ngaantam-ngeeyaniy ey? nil God.an ngangk minangam iyy-iyan niyant ey? niy yipam way niyan yump-yumpaniya anan wantāna! ⁵ Puth ya' anmana, niy kuchek-thayan iyy-iyaniya, niy kaangk ke' wik God.an ngeeyān nunang, niy puy-puyam way-wayamaniya, niyiy-a, God.an man kul yumpaniy nunang. Nil eenchiy ngula. Aakan kanan wampow-a, pam wanch yotam anangan ngamp umang ngulan thanāmp nungantangan-a, nilana kuchow niyang aak wayakan. Kaangk nilwey kuchow niyangan-a, nil ep kuchow niyang, an nung-nunganta, niyiya puth way iyy-iyaniy. ⁶ Nil puth God.an ngangk minangam iyyow thant pam wanch al-alantan minan iyy-iyantān, a' putha pam wanch way anangan aak wayakan kuchow thanang. ⁷ Than wiy anangan minam iyy-iyantān, thanan kaangk piip God.an ngangk min wunow thanttamana, a' than kaangk God.antang aak umpuyangaman wun-wunayn nungantang. Nil God.an puth thawa, “Than pam wanch inangan ngatharang aak umpuyangaman ngul wun-wunayna.” ⁸ Than puth wiy ananganiya thanttakam anman ma'-yotam ngaantam-ngeey-ngeeyantana, than wik kan-kanam anangan ke'am ngaantam-ngeeyantān, ya'a, than way anman ma'-yotam yump-yumpantān. Nil God.an puth man kul ngul wamp nunganta. ⁹ Than pam wanch wayan iyy-iyantān-a, aak way ngul wampow thant, Jews al-alantana a' puth-a, Jews ya' al-alantana, aniy-a, thana ngangk way-wayam paththam wun-wunow thant. ¹⁰ Than pam wanch minaman iyy-iyantān-a, nil God.angan minam ngul ngaantam-ngeeyow thanang a' ngangk min yumpow thanang — than Jews anangana a' puth Jews ya' anangan. ¹¹ Nil God.angan pam wanch

yotam ngangk thath-thathan thanang, than nath min iyy-iiyantana, nath ya'a, nath way iyy-iiyantana — nilan puth aak-ya'ang ke'am wayaman thant, ya'a.

¹² Than wee'-wee'anangan way iyy-iiyantana-a, than Jews nathwey-a, nath Jews ya' anangana, nil God.angan ngul aak way aakanakan kuchow thanang. Nil kuchow thanang Jews anangana puth than wik ngench thayan God.antaman ya' pip-pipin nil Moses.angan thaa'-aath-aath thanang, a' putha pam wanch Jews ya' anangan thamp kuchow thanang aak way aakanakaniya than thamp puth wayan yump-yumpantan. ¹³ Than pam wanch wiyangan wik ngench thayan Moses.antaman mee'miya. Puth napanan God.ang thanang min ke'am waa'an thananga, ya'a. Than pam wanch al-alangan thonakama wik thayan Moses.antaman konangam pi'-pi'antana-a, anangaman ep miniy iyy-iiyantana mee' God.antangana.

¹⁴ Than pam wanch wiyangan Jews ya'ana wik ngench thayan God.antaman ke'am ngeey-ngeeyin, nil Jews al-alantan ka'athaman thonakam thee'a. Puth than nathweya kaangka min iyyaynwey-a, an ke' thanwey kanama wik thayan God.antaman ngeeyina. ¹⁵ Nungkway thant wik ke'am waa'in-a, than minaman iyy-iiyantana-a, an meenathan ngampar an ke' nil God.angan wik thayan nungantaman ngangkanga puth kuchekang wunp thanttangana, thanan puth kan ngaantam-ngeeyantan ngangk thanttamanganiy min yumpanakana puth way yumpanakana. ¹⁶ An puth aak ngul wampow nil God.an thawow Christ.antan nil umang nungantang thanathow thanang pam wanchana. Nilan puth mee'miy way thanan yump-yumpin a' puth way thakan ngaantam-ngeeyin kuchek thanttamangan. Anpalaniya, nil ngul thawow thant, than wee'-wee'anangana aak minakan iyyayn, a'

putha, than wee'-wee'anangan pam wancha aak wayakan iiyayn. Wik inanganiy God.antam ngay waa'-waa'ang niyant.

Inaniya Ngay Niiyant Jews.ant Ngul Thawāng

¹⁷ Inaniya ngay niiyant Jews.ant ngul thawāng: niiyan ulp-ulpanangan thaw-thawaniy, “In ngan thaa'nganth thona! Ngana Jews inanganiya!” A' niy ngaantam-ngeeyaniy niiyantakam nil God.an ngangk minangam iiy-iyyan niiyant nil puth wik thayan nungantam niyant thee' ka'athamana. Ke'-paal niiyan ngaantam-ngeeyaniy niiyantakam ke' niyam thonakam pam wanch God.antamaniya, puth ya'a.

¹⁸ Niiy kan mee'miy woyan piip God.antaman want-wanttakan wunana niiy puth ka'athanan wik thayan God.antaman kanam ngeeyana. Niiy kan mee'miya niiy woyan want-wanttinan mi'āna niyamana woyan minakana. ¹⁹ Niiyan ngaantam-ngeeyaniy ke' niy pam wanch wiy anangan thaa'-aathaniy thanang woyan God.antaman wak-wakayn, puth ya'a, niiy puth ulp-ulpanangan wik anangan yaan thaw-thawaniya. A' niy ngaantam-ngeeyaniy thonakama ke' niy thum nganth yimanangan iiy-iyyaniy thanta, puth ya'a. ²⁰ Nil God.angan wik thayanana thee' niiyant, niiy kan mee'miy wik ananganiya an kan-kanama, min paththam niiyanta. Puth anpalana niiyan ngaantam-ngeeyaniya niyamana ke' niyana thaa'-aath-aathān thanang pam wanch wiy anangan than piip God.an ke'aman yippak thiichin nunanga. ²¹ Niiyiya pam wanch wiy anangan thaa'-aath-aathaniy thanang aa? Puth niiy thampana min ya'a! Niiy niyantakam thaa'-aath-aathān thampa. Niiy thawaniy wiy al-alantan, “Niiy ke' ma'-kuchan iiyāna,” puth niiy thampana ma'-kuchan iiy-iyyaniy ey! ²² Niiy thawaniy thanta, “Niiy ke' maarich kee'āna,” puth niiy thampana

maarich kee'aniya! Niiy puth thawaniy thant, “Ngan yuk ngeen-wiy anangana kaangk ke'a,” puth niiyiya yuk ngeen-wiy anangan ma'-kuchanang maayaniy thanang aawuch ngench thayan wiyantam anpalana! ²³ Niiyan ulp-ulpalang thaw-thawaniyweya, puth nil God.angan wik thayanan ma' niiyantangan wanta. Niiy wiy il-ilangana wik God.antaman pip-pipaniy, amanamaniya, pam wanch wiyangan piip God.an waa'-waa'antan nunang. ²⁴ Wik inan kan-kanama, puth than aak keenkan wik inangan umpin lat ngench thayanangana:

“Niiy Jews il-ilanganiya way paththam yump-yumpaniy, amanamaniya pam wanch wiy anangan thaw-thawantan, ‘Pam wanch God.antamana way yump-yumpantan ey? Yaa, nil God.angan yimanang yaaka' way yump-yumpana!’”

²⁵ Aak niiyant Jews.antan yimanangan wunana: niiy pam anangan kompan thamp iyy-iiyaniya, — ngeenam putha, an puth niiy pam wanch piip God.antam ngula. An niiyant min ey? niiy Jews punchanan iyy-iiyaniy ey? Niiy nathwey wik thayan God.antaman minam ngeey-ngeeyinwey-a, an niiyant min Jews.an iyy-iiyāna, puth niiywey wik God.antaman pip-pipinwey-a, an puth niiy Jews aak-ya'anga waa'-waa'aniywey niiyantakamana. ²⁶ Than nath pam wiy al-alangan Jews ya' ananganiya wik God.antaman ngeey-ngeeyiythanwey-a, nil puth God.angan ngul ngaantam-ngeeyow thananga thanana pam nungantam ngula. ²⁷ Than wiyangana ke'am ngeen-wiy thanntaman umpinweya, puth than pam Jews ya' il-ilangan wik thayan God.antaman minam pi'-pi'antan. Than ngul thathayn niiyang Jews inangan pam wanch way iyy-iiyaniya, niiy puth wik thayan God.antaman kanam ngeeyana, an puth ya'a, niiy ke'ama minaman pi'-pi'aniya!

²⁸⁻²⁹ Niiy nath ngaantam-ngeey-ngeeyaniy niiyantakam, “Ngamp puth Jew punchan aak-ngeey-ngeeyampa, a' thanana ngeen-wiy ngamparamana umpinwey, puth nanpalan ngamp pam nungantam piip God.antam ngul iiy-iyanampa.” An yimanangan ya'a! Than wee'-wee'anangana God.an kan-kanaman monkan-wak-wakantan nunangan-a, a' puth kan-kanaman wik nunangan ngeey-ngeeyantan-a, than pam wanch nungantam ngul iiy-iiyayna. Nil Ngeen-Wiy Min piip God.antaman ngangk thanttamangan wun-wunana, a' thay-thayanathan thanang. Pam wanch anangaman-a, nil God.angan min waa'ow thanang. Than pam wanch wiyangan min nath waa'iythan thananganiya, ya' natha, an kana, nil God.angan ngul thaa'-kuumpow thananga.

3

¹ Puth niiy niiyantakaman ngul nath thawina, “An-ngul ngamp ngeenak Jews.an iyanamp e? An-ngul min ngampar ey? ngeen-wiy pe'anan umpayn ngamparaniy ey?”

² Ee'a, an min ngampar Jews.an iiy-iyanampweya. Nil God.angan wik ka'athaman ngampar Jews il-ilantan want.

³ Wik God.antaman kan-kanama, nil wik nungantam ke'am pip, ngampangan kaa'ngak. Nungkway than pam wanch wiy al-alangan wik ke'an ngeeyiythan nunang-a, nilan puth wik nungantaman ke'am kon-ngath nunang, God.an. ⁴ Puth piip God.an ke'am wik uuy-uuyamana, pam wanch ngampiya epa wik uuy-uuyamanampa, nil God.an-a, ya'a, an puth lat ngench thayanang kan waa'an ngampar nil David aak keenkan thaw nungant God.antan: “Wik nungkaramana an kan-kanama.

Pam wanch wiyangan nathwey waa'iythan nintang-a, a' man-ngeeyiythan nintang wik nungkaram amanaman-a,

an nint meenathān wik nungkaram anangana nintan thaw-thawangan-a, an kan-kanam paththama.”

⁵ Niiy nath wik way anman ngaantam-ngeeyaniy ni-iyantakaman, “In min ngampar ngamp wayan yump-yumpanampana, yipam than pam wanch wiyangan thathayn nil God.an thonakam minana, pam wanch ngampaniya, an ya'a.” An ya'a, niiy way anman ke' iyy-iyyin a! Nath niiy yimanang thamp wik wayan ngaantam-ngeeyaniy niiyantakaman, “Nil God.angan aak wayakan ke' kuchiy ngampanga, ya'a! Puth ngamp nathwey way ke'an yump-yumpimpan-a, an puth thanan want-wanttak ngaantam-ngeeyiythan nil God.an thonakaman minan e?” ⁶ An ya'aniya, kaangk nil nath kuchiy ngampang aak wayakan-a, an nila kuchow ngampang. Nil puth God.an nil-nil, nil ke' ngamp yimanangan ya'a. An puth kan-kanam pam wanch ananganiya umangam ngul thanayn nungant, nilana thawow thant, aak minak nathwey kalow thanang, nath ya'wey, aak wayakan natha kuchow thanang than wayan yump-yumpantana.

⁷ Niiy nath way-way ngaantam-ngeeyaniy niiyaman ey? an ke' min niiyant ey? wikan uuy-uuyamān ey? An ya'a! Niiy nath wik inan tham ngaantam-ngeeyaniy ni-iyamana, “Nil puth God.angan ngeenak waa'iy ngampang way yot anangan yump-yumpanamp e? Puth ngampwey ke'an wik uuy-uuyamimpwey-a, an than wiyangan puth want-wanttak ngaantam-ngeeyiythan thanttakaman nil piip God.ana mina, nilaman thonakam wik kan-kanaman waa'-waa'an ngampara?” An ya'aniya, wik yimanangan ke' ngaantam-ngeeyāmp a! ⁸ A' niiy nath ngaantam-ngeeyaniy niiyantakamana an ke' min niiyant wayan yump-yumpāna yipam pam wanch wiyangan ngaantam-ngeeyayn nil God.an mina. An ya'a! Ngamp way ke' yump-yumpāmp a! Than pam wanch wiyangan thant-

takaman waa'-waa'antan ngayang, than thaw-thawantan ke' ngay pam wanch wik way inangan thaa'-aath-aathang thanang. An ya'a, than wik kan-kanaman ke'am waa'-waa'antan, an puth kan-kanamaniya nil God.angan ngul waa'ow thanang pam wanch wayanangana.

Pam Wanch Ma'mangkaman Way-Wayam Ma'-Yotaman Iiy-Iiyantan

⁹ Yaa, ngay kan thawāng niyant pam wanch ngamp Jews il-ilantana. Niiy ngaantam-ngeeyaniy ke' nil God.angan pam wanch Jews anangan min thath-thathan thanangan ey? pam wanch wiy anangan min ya' ey? An ya' paththam a! Ngay puth ka'athanan kan thawangan than pam wanch ma'mangkaman wayan ma'-yotaman iiy-iiyantan, thanan puth kaangk way anman iiy-iiyayn, than Jews a' puth Jews ya' anangan thamp. ¹⁰ Wik inan kan-kanama, puth lat ngench thayanangan waa'-waa'an: “Pam wanch yotaman way paththam iiy-iiyantan, than mee' God.antanamo pam wanch min ke'am iiy-iiyantan, ya' paththam.

¹¹ Than pam wanch yotamangana God.an minam ke'am thiichantan nunang, ya'a, a' than puth kaangk ke' wik God.antaman ngeey-ngeeyayn.

¹² Than pam wanch yotamangan man-mangkam thee'in nungant God.antan, than yotamangana wayathwin thanttakamana, than puth ma'mangkaman min ke'am iiy-iiyin nungant, ya'a.

¹³ Than wik way paththam aak-ya'angan waa'-waa'antan thanttakamana a' puth pam wanch wiy anangan man-monkan thenchantan thanangana.

Than wik wayan thaw-thawantan thanttakaman-a,

an ke' thaa' theek way-wayaman thuukangan pi'-pi'ana,
pam mulathanakana.

¹⁴ Thananiya pam wanch wiy anangan nench-nenchantan
thanang, a' ak-akantan thanang,

¹⁵ a' man kulan wampan thant-a, an paththam piik-
piikwuntan thanntakaman mulakama,

¹⁶ a' putha wiy anangana way-wayathantan thananga,
a' ngangk way-wayam yump-yumpantan thanang.

¹⁷ Than kulakan ma'-yotam wenk-wenkantan thanntaka-
mana,
than puth ke'am ngaantam-ngeeyantan want-wanttakan
ngangk minangaman wun-wunaynana.

¹⁸ Than puth God.ana ke'am ngaantam-ngeey-
ngeeyantan nunanga nil wuut pi'an ngampar
paththama.”

¹⁹ Ngay wik inangana lat ngench thayan ka'atham an-
palaan waa'-waa'ang niyant yotamantana, Jews il-ilantan
thampa. Niiy Jews.an puth ke' thawina, “Wik nanangan
ngampar ngul ey? An ya'a.” Pam wanch yotaman
ngamp ngul than-thanāmp um God.antang, a' thawāmp
nungant ngan puth way iiy-iiyana. ²⁰ Ngampaniya puth
ke' thawimp ke' ngampar wik thayan God.antaman mi-
nam pi'-pi'anampa, puth amanamaniya nil God.angan ke'
minan waa'iy ngampanga, ya'a! Ngamp ke' thawimp
yimananganiya, puth ngamp ke'am wik ngench thayan
nungantaman ngeey-ngeeyanampa, ya' anmana, ngamp
way yippak iiy-iiyanamp. Nil puth piip God.angan kan
waa' ngampar wik thayan yotam nungantam anangana,
ngamp yipam ngaantam-ngeeyāmp ngamparakamana
ngamp wayan yump-yumpanampweya.

*Nil God.angan Nhenk Nungantaman Kuch Nunang Kaa'-
Piichanathow Ngampang*

²¹ Ee'a, pam wanch yotamangana wik ngench thayan God.antaman pip-pipina. Puth in yimanang ngulana, nil piip God.angan kan-ngul meenath ngampar, wik anangan than Moses a' prophetsangan keenkanaman waa'in ngampar, wik engkanang ngul wun-wunan ngampar. Nil puth nhengk nungantaman Jesus Christ.an kuch nunang kaa'-piichanathow ngampang. ²² Ngamp puth wee'-wee'anangan kan-kanaman ngangkangaman pi'-pi'āmp nunang Jesus Christ.an-a, nil God.angan way ngamparman ke'-ngul ngaantam-ngeey-ngeeyow. Wik inangan God.antaman pam wanch yotamant Jews al-alantana a' puth-a, pam wanch wiyant thamp than Jews ya'ana, ²³ puth pam wanch yotaman way iyy-iiyantan, puth napanal nil God.angan pam wanch min ke'am waa'-waa'an ngampang. ²⁴⁻²⁶ Puth nil God.ana min iyy-iiyan ngampar, ngamp wukal ke'am thee'amp nungant nil yipam nhengk-kunchan kuchow ngamparana, an ya'a, nil ngangk minangam kuch nunang, an yimanaman kuch nunang ngamparaniya. Nil Christ.angan nungamang theetath way ngamparamakaniy uthamow, chaapar nungantam theetath ngamparana, nil God.angan yipam ke'-ngul ngaantam-ngeey-ngeeyow way pam wanch al-alantaman than Christ.an ngangkangaman pi'-pi'antan nunanga. Than pam wanch wiyangan nath ngaantam-ngeeyantan nil God.angan erkaman wayathow thananga pam wanch anangan aak keenkanaman wun-wunina, puth ya'a, nil ngampar meenath nilam thonakaman minana, puth nil erkam ke'am wayath thanang, ya'a, nil ngangk mam thanang, amanaman-a, an mee' engkanang ngul wun-wunan ngamparana, nil God.an min paththama. Than puth wee'-wee'anangana God.an ngangkangan pi'-pi'ayn nunang-a, nilan puth way thanttamana kon-ngathow nunang ngul.

²⁷⁻²⁸ Amanamaniy-a, ngamp ulp-ulpanangana ke' iiy-iiyāmpa, a' ke' waa'wump ngamparakam minaniya, ya'a! Ngamp ngul min-minam iiy-iiyimp ey? wik thayan God.antam yotaman minam pi'-pi'imp ey? Ya' ey! Ngamp wik nungantam ke' min-minaniy pi'-pi'impa, ya' anman. Puth than wee'-wee'anangan Christ.antan ngangkan thee'ayn-a, a' ngangkangaman pi'-pi'ayn nunangan-a, nil God.ana kon ngul ngathowana way thanttam al-alantamana. ²⁹ Niiy inan ngeeyāna, nil pam moom pi'an thonam thonakama, an nilam God anmana. Nil God thonam pam wanch yotamantana, Jews al-alantakam thonakam ya'a, puth thant wiy al-alantan thamp Jews ya' al-alantan thampa. ³⁰ Nil God.an pam wanch yotamantan thawa Jews.antan-a, puth-a, Jews ya' al-alantana, “Than wee'-wee'anangan ngayang ngangkangan pi'-pi'antan-a, ngayan way thanttaman ngul kon-ngathow ngayang.” ³¹ Puth ngampwey Jesus.an ngangkang pi'-pi'imp-a, ngampan puth wik thayan God.antamana ke' wantimpa, ya'a. Ngamp wikan konangam pi'-pi'āmp a' ngaantam-ngeey-ngeeyāmp thampa. Wik inangan God.antaman-a, an min-minam paththam ngamparana.

4

Ngay Wik Inan Abraham.antaman Ngul Waa'āng Niiyanta

¹ Ngay wik inan ngul waa'āng Abraham.antam niyanta, nil wuut mangk ngamparam Jews il-ilantamana.

² Nil God.angan pam min waa' nunanga. Ngeenam ngula? Ngul nilan wik thayan ma'mangkaman minam pi'-pi' ey? Ya'a! Nil puth Abraham.angan God.antan ke' waa'iy nungantakamaniya ke' nil minana! An ya'a! Nil puth kan mee'miy nil God.angan way nungantaman kan kon-ngath nunanga puth nilan God.an ngangkang pi'-pi' nunanga, amanaman thonakama. ³ Puth lat

ngench thayanangan waa'an, "Nil Abraham.angan wik God.antaman ngeey-ngeeya, a' God.an ngangkangam ngul pi'-pi'ana. Anpalan-a, nil God.angana way nungantamana kanam kon-ngathana."

⁴⁻⁵ Nil pam moomangan wukal thee'-thee'an pam alalantan thant work minaman iyy-iiyantam nungantana, nil wukal thant aak-ya'angan ke'am thee'-thee'an, ya'a. Puth piip God.antan aaka nil-nil wun-wunana. Pam wanch wiyangan natha ngaantam-ngeeyiythana than wik thayan nathwey minaman pi'-pi'iythana-a, yaa, nil God.angan puthangkana way thanttam anpalana ngul kon-ngathowana. Puth aak God.antan yimanangan ke'am wunana, ya'a. Nilan wik inangana ep thawa, "Niiy pam wanch way iyy-iiyaniya, puth niiy nathwey ngangkangaman pi'-pi'in ngayangan-a, yaa, puth ngayiy-a, way niiyantam anangan-a, ke'-ngul ngaantam-ngeey-ngeeyānga." ⁶⁻⁸ Nil King David.angana lat ngench thayanang wik inan ump:

"Pam wanch wiy ananganiya ngangk minangam iyy-iiyantam.

Than puth kan mee'miy than pam wanch min ya'a,
 puth nil God.angan way thanttaman kanam kon-ngath
 nunang.

Nilan puth thaw thant, 'Niiy way-wayam paththam iyy-iiyana, puth kana,

ngay way niiyantaman ke'-ngul ngaantam-ngeeyānga.'

Anpalana, than pam wanch anangana ngangk minangam ngul iyy-iiyin."

⁹ Nil David.angan thanang Jews anangan thonakam ke'am waa'-waa'an, ya'a, nil pam wanch wiy anangan thamp waa'-waa'ana. Ngamp kan mee'miy, lat

ngench thayanangan waa'-waa'an ngampar, “Nil Abraham.angan ngaantam-ngeey paththam nil God.an kan-kanaman thaw-thawana. Anpalana, nil God.angan way nungantaman ke'-ngul ngaantam-ngeeyow.”¹⁰ Nil God.an wik inangan thaw nungant-a, nil Abraham.an kompan thamp ke'aman yippak iyy-iyya, ke'am yippak ngeen-wiyen umpin nunanga. Nil puth Jew yippakan ke'aman iyy-iyy puth aak an-aniyangan than pam wanch Jews ke'anangan yippak iyy-iyyinana.¹¹ Ngul-ngulana, nil God.an thaw nungant Abraham.antan, a' putha pam kompan nungantam al-alantan thanan kompan thamp iyy-iyyayna, ngeen-wiy thanttaman ump-umpwayna. Ngul anpalaniy-a, nil God.angan way Abraham.antum ke'-ngul ngaantam-ngeeyiy ey? Ya'a! Nil ka'athangaman ep pam min waa' nunanga, a' way nungantam anpalana kanam kon-ngathana, nil puth Abraham.angan wik God.antum kan-kanaman ngangkangam pi'-pi', anpalana. Nil puth God.an thaw thant kompan thamp iyy-iyyayna than yipam wiyangan ngaantam-ngeeyayn nil way thanttaman ke'-ngul ngaantam-ngeeyow. Aak anpalman-a, thanan puth Jew ngul waa'-waa'in thanang.¹² Nanpalana nil Abraham.an ke' wuut mangk pam wanch al-alantaman weena than God.an ngangkangaman pi'-pi'in nunang — thanttam Jew al-alantaman-a, a' putha thanttam wiyantam thampang than kompan ke'anangan iyy-iyyantana. Than inangana, nil God.angan way thanttaman ke'-ngul ngaantam-ngeey-ngeeyana.

Nil Abraham.angana Ngangkangam Pi'-Pi' Nil God.an Kan-Kanaman Thaw Nungant

¹³ Aak keenkanamana nil God.angana kaa'ngak nunang Abraham.ana, nilan thaw nunganta, “Ngay ngula aak pi'an thee'āng niyanta, puk niyantamak a' putha

puk thanttamak thamp thee'ānga. A' thanan pam pi'an ngul iyy-iiyayn.” Nil piip God.an wik yimanang ngeenak ngul thaw e? Ngul nil Abraham.angan wik thayan God.antaman minam anman pi'-pi' ey? Ya'a! Nil puth Abraham.angana wik God.antamana ngangkangam kan-kanaman pi'-pi'a nil piip God.angan anpalan kaa'ngak nunangana. Amanamana, nil God.angana way nungantamana ke'-ngul ngaantam-ngeey-ngeeya.¹⁴ Ngamp nathwey wik thayan ma'mangkaman pi'-pi'impan-a, an ngamp min iyy-iiyimp mee' God.antangana — ngamp ngeenak ngul ngangkan thee'amp nungant Jesus Christ.antane? A' nil puth ngeenak God.angan kaa'ngak Abraham.ana? Puth ya'a, ngamp ya'angam wik thayan ma'mangkam anangan pi'-pi'impana. Nil puth piip God.angan aak-ya'angana ke'am kaa'ngak nunangana a' puth nanpalan nil God.an thawa, “Niiy kan-kanam ngaantam-ngeey-ngeeyān ngayang ngay way niiyantamana ke'-ngul ngaantam-ngeey-ngeeyānga.”¹⁵ An ngamp wik thayan ke'ananganwey wunimp-a, an ngamp wik thayanan ke' pipimp aa? Puth ngamp wik thayanan ep mee'miy ngula, an ngamp ke' wik thayanan pi'imp-a, puth ya'angam, an puth ngamp ma'-yotam wik thayanan pip-pipanampa. Puth nanpalana nil piip God.antan man kul ngul wampant a' nil ngul wayathow ngampang.

¹⁶ Puth ngamp ngangk ngamparaman ep thee'āmp nungant God.antana. Anpalan nil God.an ngul ngangk minangaman iyy-iiyow ngampar ke' nil nungant Abraham.antan ngangk minangaman iyy-iiya. Nil God.angana wik min kaa'ngak nunang Abraham.ana a' putha wikan kan-kanam ngampar thampang want pam wanch yotamantana ngangkangam pi'-pi'anamp nunanga, puth ngampweya mangk nungantang

Abraham.antangan wampamp nungant God.antan. Nil Abraham.an pam wuut mangk thanttam Jews al-alantaman a' puth pam wanch wiyantam thamp, pam wanch aak umyompanam wik God.antaman ngangkangaman pi'-pi'antana ke' nilan wik God.antaman ngangkangaman pi'-pi', Abraham.angan. ¹⁷Wik inan kan-kanama, puth lat ngench thayanangan waa'an thampa nil God.an thawant Abraham.antan, “Ngay nintang wuut mangk pam wanch yot al-alantaman waa'ang nintang, pam wanch thaa'nganth thon-thonan thaw-thawantana putha aak nath-nathan wun-wuntan.” Wik inangan nilam God.an thaw-thawan Abraham.antan, kan-kanaman thawana, nil Abraham.angana kan-ngul ngaantam-ngeey nil God.an kan-kanam thaw-thawana. Nil God.angan puth yuk way min ma' nungantang pi'-pi'an. Nilaman pam mulaman koyaman ekathan. Nilam mee'miy ngeen ngulan wampow. Nungkwaya than pam wanch ke'aman yippak aak-ngeeyin-a, nil ep God.aniy puth mee'miy thanang nathpalman. Thantaniy-a, an nilam God.angan ngangk thee'an, aak-ngeeyanakana. ¹⁸God.an Abraham.ant thaw, “Pam wanch puk nungkaram anangana a' putha puk thanttaman, thananiy thaa'-wantanam ke' thunp inang kenyan ngul weenayna.” Nungkway nil Abraham.an wuut kath ngulan weem-a, nil kan-kanam ngaantam-ngeey nil puk many ngulan wampow nungantweya. Nungkway nil puk ke'anangan yippak-a, nilana ngangkangam pi'-pi' nil God.ana kan-kanamaniy thaw nungant, nil wuut mangk ngulan iiyow thanttaman pam wanch yotantaman aak nath-nathan wun-wuntan. ¹⁹Nunanganiya kaap one hundredang wantana, nil pam wuut kath ngul weem; a' puth wanch thum nungantaman Sarah.ana, wanchinth kath thamp iiy-iya. Nilan kan ngaantam-ngeey wanchinth way-

wayam ngul, puk ke'am kal, puth nilan kan ngangkangam pi'-pi' nil God.an kan-kanaman thaw nungant. ²⁰⁻²¹ Nil Abraham.angana God.an ke'am man-ngeeya, ya'a, nil anman ngangkangam pi'-pi' nil God.an wik thaw nungantana, puth nil God.an thaa'-kuumpam, nilan puth kan ngaantam-ngeey nunang God.an pi'an paththama, nil puk manyan ngul thee'ow pulant. ²² Puth nanpala nil God.angan way nungantaman ke'-ngul ngaantam-ngeeya, ya'a.

²³⁻²⁵ Thanan wik inangan lat nench thayanangana ngampar ngul wantin. An nungantakam Abraham.antan thonakam ya'a, an wik inangan ngampar thampa, ngampar al-alantan wik God.antanamo ngangkangaman pi'-pi'anamp. Nil God.ana way ngamparam thamp ngul kon-ngathowan, puth thanan Jesus.an theetathin nunang mulan wunow, anpalana nil God.an thaw, “Yaa.vey, puk nhengk ngatharaman kan uthama way thanttamakana pam wanchantamana.” A' anpalana nil God.angan mulaman ekath nunang ngul, a' thaw ngula, “Yaa.vey, way pam wanchantamana kon-ngathowany ngula a' ke'-ngul kuchāng thananga aak way aakanakana.” Than puth wee'-wee'anangana kan-kanaman nunang God.an ngangkangaman pi'-pi'antan-a, nil puth God.angan way thanttaman ke'-ngul ngaantam-ngeey-ngeeyow, ya'a.

5

Ngamp Wee'-Wee'anangan Jesus.an Ngangkangan Pi'-Pi'imp Nunangan-a, Nil God.angan Way Ngamparaman Ke'-Ngul Ngaantam-Ngeeyow

¹ A' ngampaniy-a, Jesus.antan ngangk kan thee'amp nungantana, anpalmana nil God.angan way ngamparaman ke'-ngul ngaantam-ngeey-ngeeyow. Ngampana kuchek-thayanan ke'-ngul iyy-iiyāmp God.antana, puth

yimanang ngulana ngamp ngangk minangam iyy-iiyāmp nungantana, puth nil Lord Jesus Christ.aniya way ngamparamakan utham. ² Nil God.an kan-ngul ngangk minangam iyy-iiyan ngampar, a' ngamp yimanangana ngangk minangam ngul iyy-iiyanampa, puth ngampan mee'miy nil God.angan ngulan kalow ngampang aak nungantangan wun-wunāmpa. ³ Inan thampa, nungkway aak wayan nath wampow ngampar-a, ngampan puth ngangk minangam iyy-iiyāmpa, nil puth God.angan ngangk ngul thay-thayanathow ngampang. ⁴ Ngamp kan-ngulan ngangk thayanaman iyy-iiyanampan-a, an ngampa minaminam ngul iyy-iiyanampa. Puth thon ina, ngampa mee'miy ngula nil God.angan ngulan ngampang kalow aak nungantamakana. ⁵ Nilan ngampang ke' monkanthenchiy ngampang, ya'a, nil ngampangan kan-kanam ngul kalow aak nungantamakana. Ngampan mee'miy nilan kan-kanam kaangk paththam wunan ngampar, nil puth Ngeen-Wiy Min nungantamana kuchan ngangk ngamparamangan wun-wunow.

⁶ Ngamp ke'aman yippak God.an ngangkangaman pi'pi'ampan-a, ngampiya way anman yump-yumpampa, ke' minan iyy-iiyimp-a, an puth ya'angama. Aak anan kan-ngul wampant-a, nil God.angan mi'a, nil Christ an-aniyangan utham pam wanch way il-ilantan ngampara. ⁷ Nil puth wee' kaangk uthamowan e? pam min alantamany e? aak nungantamangan e? An ya' natha! Nath pam thonam puya nil kaangkan uthamowana pam min paththam alantamana, ya' natha. ⁸ Puth nungkway ngampana way anman iyy-iiyamp-a, nil Jesus Christ.an utham ngampara, anpalana God.angan meenath ngampar nil kaangk paththam wun-wunan ngampar. ⁹ Nil puth Christ.angan chaapar nungantaman theetath ngampar, amanam ngulana nil God.angan

way ngamparaman ke'-ngul ngaantam-ngeey-ngeeyow, inan thampa nil kan-kanaman ngampang ke' kuchiy aak nungantam anpalana. ¹⁰ Ngamp ka'athaman wayan yump-yumpamp-a, an ngamp God.an ngangk kul yump-yumpamp nunangana. Puth nungkway ngamp wayan yump-yumpamp-a, nil God.angan nhengk nungantaman kuch nunang uthamowan ngampar, nil yipam way ngamparaman ke'-ngul ngaantam-ngeey-ngeeyow. A' nil Jesus Christ.an mulaman eka, anpalmana, ngamp kan-kanam ngul ngaantam-ngeey-ngeeyanamp nunang God.an nil ngulana an min-minam pi'-pi'ow ngampang a' aak nungantam ngulan wun-wunāmp. ¹¹ A' putha inan thampa, ngamp anman thaa'-kuump-kuumpanampa, puth nil Jesus.an utham way ngamparamakan a' nil God.ana kan-ngul kon-ngath nunang way ngamparam anangan, nil ngurp min nungantam ngul yump ngampanganana.

Nil Jesus.an Ke' Adam Yimanangan Ya'a, An Nil-Nila

¹² Aak keenkanamana nil Adam.angan way yumpa, amanamana pam wanch yotaman way ngul weenampa, way anman yump-yumpanamp, anpalmaniya, pam wanch yotam ngulana uth-uthamanamp, puth ngamp yotaman way iyy-iyanamp. ¹³ Aak keenkanamana, than pam wanchangana way yump-yumpin, puth nil God.an ke'am thaw thanta, “Niiy wik thayan ngatharamana pipana,” puth nil wik thayan Moses.antan ke'am yippak thee'a. ¹⁴ Aak anpalmana nil Adam.an wun-wuna aak-aakanakaman nil Moses.angan wik thayanan thee' thant ngul-a, than pam wanch anangana uth-uthamina, puth than yotaman way anman iyy-iyin. Nil God.an thaw nungant Adam.antan mayan ke' mungkowa, puth nil Adam.ana kuchek-thayan iyy a' mayana mungk. Nil

God.an Adam.ant thonakam wik inan thaw. Than pam wanch wiyangan ke'am ngeeyin nil God.an wikan thaw-thaw thantana, nil Adam.antan ep thaw, puth than thamp way iiy-iiyin.

Nil Adam.an-a, ka'atham wun-wuna, nil Jesus Christ.aniya ngul-ngulan uka aak iikanakan. ¹⁵⁻¹⁸ Nil Jesus.an ke' Adam yimanangan ya'a, an nil-nila. Adam.aniya, wik God.antamana ke'am ngeey, nil kuchek-thayan iiy-iiya, nil way yump a' puth than yotamangan woyan nungantamana wak-wakin, way iiy-iiyin. Nanpalaniya, nil God.an ngaantam-ngeey nungantakam, “Than pam wanch yotam way iiy-iiyantane ey? Mak uthamayna! Ngayana aak way aakanakan kuchāng thananga.” Ka'athamana, nil pam thonamang Adam.angan way yump a' nil utham ngul. Amanamaniya than pam wanch yotam ngul way iiy-iiyantana, a' than ngul uth-uthamina, nil yimanamana. Puth nil Christ.angana, ep wik God.antaman ngeeya, nil ke'am way thakan yumpa, ya' paththama. Nilan uthama, nil yipam pam wanch kaa'-piichanathow thanang. Nil God.angan Christ.an kuch ngamparana, nilan puth ngangk min iiy-iiy ngampar. Nungkway ngamp ma'-yotaman wayan iiy-iiyanamp-a, nil God.an thawa, “Nil Jesus.an ngangk minangam iiy-iiy niiyantana, nil puth utham way niiyantamakana. Ngay thampana ngangk minangam iiy-iiyāng niiyantana, ngay way niiyantaman thampa yaaman ke'-ngul ngaantam-ngeey-ngeeyānga, a' ngay niiyangana kan-ngul kalāng aak ngatharamakana.” Puth than wee'-wee'anangan ngaantam-ngeey-ngeeyayn nil Christ.an way thanttamakan utham-a, a' putha ngangkan thee'ayn nungant-a, nil God.angan kan-kanaman way thanttaman ke'-ngul ngaantam-ngeey-ngeeyowa, a' pam wanch wayana ke'-ngul waa'ow thananga, ya'-ngul.

¹⁹ Ina aak yimanangan wunana: nil pam thonamang Adam.angan wik God.antaman ke'am ngeeya, nil kuchek-thayan iiy, wik pip God.antaman, anpalmana than puth pam wanch yotaman way ngul iiy-iyyin. Puth nil pam thonamang Jesus.angana, ep wik God.antamana ngeey, a' utham yuk wuuyanangana, anpalana nil God.angan pam wanch yotamantam wayana ke'-ngul ngaantam-ngeey-ngeeyow, pam wanch al-alantamana than ngangkan thee'in God.antana.

²⁰⁻²¹ Aak keenkana, nil God.an Moses.ant thaw wik thayan nungantaman waa'ow thant pam wanchantan than yipam ngaantam-ngeeyayn than ttakamana than wayan yump-yumpantan, wik thayan God.antaman pip-pipantan. Puth ngampan puy-puyam way yump-yumpanamp, ke'-paal ngamp uth-uthamanampa. Nil God.angan kuchiy ngampanga! Puth nungkway ngamp way anman iiy-iyyanamp-a, nil God.an ngangk minangam iiy-iyyow ngampar, nilan kaangk ke' way ngamparaman yaaman ngaantam-ngeey-ngeeyow. Nilaniya puth Jesus Christ.an kucha nilam puth pam min paththamana, nil paal utham way ngamparamakana. Nil puth God.an thaw ngampar, “Niiy Jesus.antan ngangk thee'an-a, niiyana ngatharang ngul wun-wunān aak umpuyangama.”

6

Ngamp Way Anman Ke' Iiy-Iiyāmp, Ya'a!

¹ Ngamp kan mee'miy nil God.an min paththam iiy-iyyan ngampara, ke'-paal ngampan ke' thawimpa, “Ngamp way anman iiy-iiyāmp nil yipam God.angan ngangk mam-mamow ngampanga, way ngamparaman ke'-ngul ngaantam-ngeey-ngeeyow.” ² Appang, an ya'a! Ngamp wik yimanangan ke' thawimpa. Ngamp puth ngangk kanam thee'amp nungant Christ.antan,

puth amanaman-a, ngamp woyan wayan ke'-ngul wak-wakāmpa, ngamp way anman ke' iyy-iiyāmp, ya'a! ³⁻⁵ Ngampiya an-aniyangan ngangk Jesus.antan thee'amp-a, thanana ngampang kootra ngakang kuungkin. Inan puth meenathan thant pam wanch wiyantan ngamp pam wanch nungantam Jesus.antaman ngul iyy-iiyanampa. Nil God.angan ke' ngampang kuchiy-a, puth ya'a, nil Jesus Christ.an ngul kee'-ench ngamparana, ke'-paal ngampana mee'miya nil Jesus.an uthaman-a, an ke' ngamp thamp angman uthamamp nungantang. Than aak awar kunttowang angan thenchin nunang-a, an ke' ngampang thamp karpam awarangan thenchin angman Jesus.antanga. Nil piip God.angan ma'-thayanang mulaman ekath nunang Jesus.an-a, an ke' nil God.angana karpam ngampang thampa mulaman ekatha, ngamp yipam woyan wayan yaam ke'-ngul wak-wakāmpa, ngamp woyan min God.antamana ep wak-wakāmp.

⁶⁻⁷ Nil paman uthaman-a, ma' thakan yuup ke'anang ngul wun-wunana, wayan puth-puthaman ke'-ngul yumpiy, ya'a. Inan puth yimanangan wunana: ngamp ka'athaman way iyy-iiyampa, way-wayam paththam iyy-iiyamp, puth ngangk ngulan thee'amp nungant Jesus Christ.antan-a, an ke' ngampang thamp yuk wuuyanangan waanchin nungantangan, ke' nungantang angman karpam uthamampa, amanamana ngampaniya ma' oony wayantang ke'-ngul iyy-iiyāmpa, wayana kaangk ke'-ngul yump-yumpāmpa. ⁸ A' ngampaniya mee'miy ngul ngamp Jesus Christ.antang angman iyy-iiyāmp, puth ngamp an ke' nungantang angman karpam uthamampa. ⁹ Ngamp puth inan thamp mee'miy: nil Christ.an mulam eka, a' nil puthaman ke'-ngul mul wunowa, ya'a. ¹⁰ Anpalmana, nil oony way pi'an alangan Jesus.an ke'am ngul thaachan nunang wayan iyy-iiyow, ya'a. Nil

Jesus.an man-yetham ngulakam iyy-iiyowa, nil piip-kunch God.ana ngangk min anman yump-yumpowana.

¹¹ Niiyiya niiyantakaman ngaantam-ngeey-ngeeyāna, “Ngamp pam wanch God.antama, ngampam ke'-ngul wik oony way pi'an alantaman ngeey-ngeeyāmpa, ngampama way ke'-ngul iyy-iiyāmp, ya'a, puth ngamp pam wanch Jesus Christ.antam ngul iyy-iiyāmpa, ngamp yipam God.an ngangk min anman yump-yumpāmpam.”

¹² Niiy ma' oony way alantangan ke' iyy-iiyāna, niiy wayan ke' ngaantam-ngeey-ngeeyāna, niiy woyan wayana too wantān. ¹³ Niiy ke' wayamāna. Ma' niiyantamangana wayan ke' yump-yumpān; tha' niiyantamangana aak wayakan ke' iyy-iiyān; kuchek niiyantamangana ke' wayan ngaantam-ngeey-ngeeyāna; thaa'nganth niiyantamangana wik wayanang anangan ke' thaw-thawāna; yimanamana way ke' iyy-iiyina, ya'a: niiy piip God.an wik ngeey-ngeeyāna, an ke' niiy nungantang Jesus.antang karpam uthamana, niiy woyan God.antam kan-ngul wak-wakaniy, min anman iyy-iiyaniya! Niiy puth ma' niiyantamangana min yump-yumpāna; tha' niiyantamangana aak minakan iyy-iiyāna; kuchek niiyantamangana niiy minam ngaantam-ngeey-ngeeyāna; thaa'nganth niiyantamangana wik minam thaw-thawāna; yimanaman minam iyy-iiyāna, wik God.antaman ngeey-ngeeyāna! ¹⁴ Aak imanamana niiyan ma' nungantang oony way alantangan ke'-ngul iyy-iiyāna, ya'a, nil piip God.angan way niiyantamana kan kongath nunanga. Niiy mee'miy niiyamana wik thayanan minaman ke'am pi'-pi'aniy, puth nil piip God.angan ngangk minangam iyy-iiyan niiyanta a' puth nil ngula ma'-aath-aathow niiyanga niiy yipam min anman iyy-iiyāna.

Ngamp Min Anman Iyy-Iiyāmpa!

¹⁵ Niiy wiyangan natha yimanangan ngaantam-ngeey-ngeeyaniya, “Ngay ngeenak min iiy-iyyāng a? Ngay wik thayanan ke' ngeey-ngeeyinga! Ngay way anman iiy-iyyāng, nil puth piip God.ana min iiy-iyan ngath-ara, ke'-ngul ngaantam-ngeey-ngeeyow way ngayan yump-yumpanga.” An ya'a! Niiy yimanangan ke' ngaantam-ngeey-ngeeyāna! ¹⁶ Puth in ngeeyāna: niiy ngul wee' ngeey-ngeeyaniy nunang ma'-yotaman e? Nil ke' moom niiyantam yimanangan iiy-iyyane? Ni-iywey oony wayan wik ngeey-ngeeyin nunangan-a, an ke' nil moom niiyantam iiy-iyyana. Puth niiywey God anman wik ngeey-ngeeyinan-a, an nilana moom niiyantam ep iiy-iyyana, a' nilana way niiyantam ke'-ngul ngaantam-ngeey-ngeeyowa; puth niiy ke'wey God.an ngeey-ngeeyān nunangan-a, a' way anman yump-yumpānan-a, nil God.angana aak way aakanakan kuchow niiyang. ¹⁷ Niiy ka'athamana way anman ke'-ngoongkam iiy-iyan, puth ngayan thankyou thawang nungant piip God.antan niiyan puth yimanangana ep ngul wik nungantaman kan-ngul ngangkangam pi'-pi'aniy wiyangan waa'-waa'antan niiyantana. ¹⁸ Nil Christ.angan woyan wayamana kecham kal-kalan niiyanga, nil ngul moom niyantam iiy-iyan, a' putha niiyan kaangk ngul min anman iiy-iyyāna. ¹⁹ Ngay wik inaniy engkanang thaw-thawang niiyanta, niiy yipam min-minam ngul ngaantam-ngeey-ngeeyāna. Niiy ka'athamana ma' nungantang oony way alantangan iiy-iyyana, aniy-a, way-wayam paththam iyy-iyyana, puth yimanangana, niiy min anman ngul iyy-iyyāna, niiyan yipam woyan min God.antamana wak-wakāna, niiyan yipam piip God.ana ngangk min yump-yumpān nunanga.

²⁰ Niiy ka'athamana min ke'am ngaantam-ngeey-ngeeyan, iiy-iyan thakana, ya'a, niiyan puth ma' nun-

gantang oony way alantangan iyy-iyyan. ²¹ An-ngul min niyyant ey? An ya'a! Puth niyyana nyaa'-nyaa' ngul iyy-iyyan way niyyan yump-yumpana, amanamana. Than pam wanchang wayan ma'-yotam yump-yumpantanan-a, than uthamaynan-a, than God.antangana ke'-ngul wun-wunayna, nil kuchow thanang aak way aakanakana. ²² Puth nil Christ.angan kan-ngul kal niyyang woyan way anpalan woyan minak ngula, a' niyy wik God.antaman kan-ngul ngeey-ngeeyaniy nil puth moom niyyantam. A' puth inana, nil ma'-aath-aathan niyyang woyan min nungantaman wak-wakāna. Niiyaniya nungantang ngul wun-wunān aak umpuyama. ²³ Ngay inan thawang niyyant: than wee'-wee'anangan way anman yump-yumpayn-a, an ke' than work iyy-iyyantan oony way alantana, nil ke' moom thant — amanamana, thanan uthamaynan-a, than aak wayangan wun-wunayn. Ngamp wee'-wee'anangan ngangkan thee'-thee'anamp nungant Jesus Christ.antana, an nil God.angan kalow ngampang aak nungantang wun-wunāmpa, wukalan ke' thee'impanta, nil yimanangman kalow ngampang aak nungantamakana.

7

Wik Thayan God.antam Anangana Nil Moses.angan Want Ngamparan-a, An Moom Ngamparam Ya'-Ngula

¹ Niiy ngurp ngatharam-ang, ngay niyyant il-ilantan thawānga niyyan wik thayanan God.antamana mee'miy nil Moses.angan want niyyantana. Niiy puth kan mee'miy wik thayan inan ngampar ngula pam wanch al-alantan man-yethaman yippak iyy-iyyanamp; ngamp uthamāmpan-a, ngamp ke'-ngul wik Moses.antaman ngeey-ngeeyāmpa, an ya'-ngula. ²⁻³ Aakan yimanangan wunana: nil pamaniya, moom iyy-iyyan wanch thum nungantamakana. Wik thayan anan thawana

nil wanchana angman wun-wunow pam-kunchantanga. Nil pam thonantanganwey wun-wuniyan-a, an nil wik thayanan pipana, puth nilan maarich pam thonantang ngul kee'ana. Puth pam thum nungantaman uthamiywey-a, nil wanch alangan wik thayanan ke'ngul ngaantam-ngeeyow, ya'a. Nilwey wanch alangan pam thonwey maayiyan-a, an nil ke'ama maarichan kee'-kee'ana, ya'a, nil pam ka'athaman maaya an puth kanam uthama. Nil pam thon inana moom ngul iyy-iiyow nunganta. ⁴ Inana aak yimanangan wun-wunana: niyy ka'athaman ngaantam-ngeey-ngeeyan ke' nil wik thayan Moses.angan thee' ngamparana, ke' moom ngamparam yimanangana. Puth wik thayanan-a, moomana ke'ngul iyy-iiyow ngamparana, puth nil Christ.an uthamana, an ke' ngamp thamp angman uthamamp nungantang, ke'-paal wik thayanana moom ke'ngul iyy-iiyow ngampar. Nil Christ.ana ep-paththam moom ngamparam ngula. Nil mulaman ek-a, nil yipama ngangk ngamparangan wun-wunow, ngampam yipam min iyy-iiyāmpa. ⁵ Ngamp pam wanch Jesus.antam ke'aman yippak iyy-iiyampam-a, ngampam way anman yump-yumpampweya. Wik thayan piip God.antaman kuchekangan wampam ngampar-a, an ngampa ngaantam-ngeey-ngeeyampa way anman yump-yumpāmpa. Ngamp nathwey way yimanang anman iyy-iiyimpan-a, nil God.angan aak way aakanakan kuchow ngampang. ⁶ Ngamp ka'athaman-a, wik thayan God.antaman pip-pipampa, puth nil Christ.an uthama way ngamparamakana, ke'-paal wik thayan God.antam anangana nil Moses.angan want ngamparana, an nil moom ngamparamana an ya'-ngula, ngamp pam wanch Jesus.antam ngul iyy-iiyanamp a' nil Ngeen-Wiy Min nungantam God.antaman ngangk ngamparangan wun-wunana, ma'-aath-aathan ngampang ngamp yipam

God.ana ngeey-ngeeyāmp nunang.

Nil God.angan Wik Thayanan Thee' Ngamparana Ngampan Yipam Mee'miy Wunāmp Ngampan Wayan Yump-Yumpanamp

⁷ Ngul wik thayan God.antam anangana nil Moses.angan want ngamparan-a, an way ey? Ya'a! Nil Moses.anganwey wik thayan ke'an thee'iy ngamparan-a, ngay puth wanttak ngaantam-ngeeying ngatharakaman ngay wayan iyy-iiyang a? Nil puth wik thayan God.antamangana waa'-waa'an ngampar, “Niiy ke' mee'-wunān yuk way min pam wanch wiyantamakan.” Ngay nathwey wik thayan inangan ke'an mee'miy weening-a, ngayan puth ke' ngaantam-ngeey-ngeeying ngatharakamana ngay wayan iyy-iiyangan yuk way min wiyantamak thakan mee'-wun-wunanganana. ⁸ Ngay puth wik anangana kan mee'miya, ngay puth wanttaka way anman iyy-iiyanga mee'-wun-wunangan yuk way min pam wanch wiyantamakana. Ka'athaman ngay ke'am ngaantam-ngeey-ngeeyangan ngatharakam ngay way paththaman iyy-iiyangana, puth ngulana ngay wik thayanan kan-ngul thiichangan, a' ngay kan-ngul thiichang ngatharakaman thampa ngay pam wayan iyy-iiyanga.

⁹ Ngay puk manyaman iyy-iiyangan-a, ngay wik thayan God.antamana min-minam ke'am thiichangana, ngay ngatharakaman ngaantam-ngeeyang ke' ngay minan iyy-iiyangane, puth ya'a, ngayan puth min ke'am iyy-iiyangana. Puth ngul-ngulana an epa ngay wik thayanan thiichangan ngula a' anpalana ngay mee'miy ngul weenang ngay wayan iyy-iiyanga, a' ngayan ngangk way paththam ngul iyy-iiyangana, ngay puth ngaantam-ngeey-ngeeyanga nil God.angan aak wayakan nath kuchow ngayanga. ¹⁰⁻¹¹ Wik thayan God.antam alangan woyan minana waa'an ngathara. Ngay ke' wik thayanan

pi'inga, puth ya'a. Wik thayan piip God.antaman kuchekangan wampanar-a, an ngay ngaantam-ngeey-ngeeyang way anman yump-yumpānga. Ngayan puth-putham ngul wayan yump-yumpangan. A' ngay ngangk way ngul iyy-iiyang, ngay puth mee'miy nil God.angan aak wayakan kuchow ngayang.

¹²⁻¹³ Niiy nath ngaantam-ngeey-ngeeyaniy wik thayan inangan ke' way ey? An ya'a, wik thayan inangan min paththama. Ngayaniy ep-paththama way yump-yumpang. Puth nil God.angan wik thayanan thee' ngampar ngampan yipam mee'miy wun-wunāmpa ngamp wayan yump-yumpāmp-a, an way paththam mee' nungantang God.antangana.

Ngay Kaangk Pam Min Ngul Iiyānga, Puth Ya'angam, Ngay Minam Ke'am Iiy-Iiyang

¹⁴ Ngamp puth kan mee'miy wik thayan inangan nil Ngeen-Wiy Min God.antam alangan thee' ngampar an wik min paththama; puth ngayan min ya'a, ngayang ke' kon-ngathiy way yumpanakana, ngayan puth woyan wayang angan wipangan. ¹⁵ Ngay puth way anman ngeenak iyy-iiyang e? Ngay kaangk pam min ngul iyy-iiyānga, puth ya'angam, ngay minam ke'am iyy-iiyang. Ngay way kaangk ke' iyy-iiyānga, puth ngayana way anman iyy-iiyang. ¹⁶ Ngay wayan yump-yumpangan-a, ngay ngangk way paththam iyy-iiyang, puth nanpala ngay kan-ngul mee'miy wik thayan God.antamana an mina. ¹⁷ Ngay kaangk wik thayan God.antaman ngeey-ngeeyānga, puth ya'angam, ngangk ngatharam yam pekan-a, ngay way anman ngaantam-ngeey-ngeeyanga. ¹⁸ Ngay puth mee'miy ngatharakaman ngay min ya'a, nungkway ngay kaangk min kan-kanam ngul iyy-iiyāng-a, puth ya'a, ngay min ke' iyinga, ya'a. ¹⁹ Ngay kaangk min

iiyānga, puth ya'angam. Ngay wayan ke' kaangk yump-yumpānga, puth ngayana way anman yump-yumpang.
²⁰ Ngay way-wayaman kan-kanam kaangk ke' iiy-iiyānga, puth ya'angam, puth ngangk ngatharaman yam pekan-a, ngay way anman ngaantam-ngeey-ngeeyang, ngayan ke'-paal woyan wayan wak-wakang. ²¹ Inan ke' aak yimanangan wunan ngathar: ngay ke' minan iiyingan-a, puth ya'angama, ngay ma'-yotam way ngaantam-ngeey-ngeeyanga way yumpanakana.

²² Ngay kaangk kan-kanam paththam wik God.antaman ngeey-ngeeyānga, an puth ya'a, ²³ puth in ke' wayan ngangk ngatharangana ke' kulak yimanangan wenkan nungant min alantana, pul pekwunpul min alangana, a' putha way alangana — puth amanamana, nil way alangana thaachan ngayang wayan yump-yumpānga, ngayana anman way ngul iiy-iiyang. ²⁴⁻²⁵ Ngay puth wik God.antamana ngaantam-ngeey-ngeeyang a' puth kaangk min iiy-iiyānga, puth ya'a, ngay way anman yump-yumpang. Nanpalaan-a, ngayan putha pam ngangk way anman iiy-iiyang a! Nil puth God.angan nathwey kuchow ngayang aak thonakana. Ngayangan nil wee'ang ma'-aath-aathowany minan iiy-iiyāng a? An nil thona-mang epa nil Jesus Christ.anga, Lord ngamparamangana! An puth ngay thankyou thaw-thawang nungant piip God.antana.

8

Ngamp Wik Ngeen-Wiy Min God.antam Alantaman Ngeey-Ngeeyāmpa!

¹ Ngamp pam wanch nungantam Jesus Christ.antaman-a, nil God.angan ngampang ke'-ngul kuchow aak wayakana, ya'-ngula. ² Puth nil God.angan Ngeen-Wiy Min nungantaman kuch ngampara, a' puth nil

Jesus Christ.an ngangk ngamparang ngul wun-wunana, ngampaniya yipam wayan ke'-ngul iiy-iiyāmp ma'-yotamana, a' puth nil God.angan yipam ngampang ke' kuchow aak way aakanakana. ³ Nil God.angan wik thayan nungantaman ka'athaman waa' ngampara, ngamp ke' minan iiy-iiyimp-a, puth ya' anman. A' nil piip God.angan nhengk nungantaman Jesus Christ.an kuch nunang ngul ngamparana. Nil pam ngul ween ke' ngamp yimanangan, nil pam wayan ke'am iiy-iiy, ya'a, pam min anman iiy-iiya. Nil mulaman koyam ngul eka. Puth nilama thonamang epa ma'-aath-aathiy ngampang ngampan yipam woyan wayan ke' wak-wakāmpa, ⁴ a' ngamp yipam wik Ngeen-Wiy Min God.antamana ngeey-ngeeyāmp nunang. Nil ngampang ngul ma'-aath-aathow wik thayan God.antaman ngeey-ngeeyāmpana, ngamp kuchek-thayanan ke' yipam iiy-iiyāmpa, way thakan ke' yipam yump-yumpāmpa, ya'a.

⁵⁻⁶ Puth than wee'-wee'anangan kaangk woyan thanttakaman wak-wakayn-a, ke'an kaangk wik God.antaman ngeey-ngeeyayn-a, yaa, thananiy putha way ma'-yotam ngaantam-ngeey-ngeeyantana; a' puth nanpala nil God.angan aak wayak ngul kuchow thanang aak umpuyangama; puth than wee'-wee'anangan wik Ngeen-Wiy Min God.antaman kaangk ngeey-ngeeyayn-a, yaa, thananiya woyan min nungantam anman ngaantam-ngeey-ngeeyantan, a' puth nanpalana nil God.angan ngangk min yumpow thananga a' thanan aak umpuyangam ngul wun-wunayn nungantanga. ⁷ Puth than wee'-wee'anangan way anman ngaantam-ngeey-ngeeyantan ma'-yotaman-a, than al-alangan God.an ngangk-wayangam kal-kalantan nunang, a' than wik nungantam ke' ngeey-ngeeyantan, ya'a, than ke' ngeey-ngeeyiythan than puth pam wanch wayananga.

⁸ Than wee'-wee'anangan woyan way thanttam anman wak-wakantan-a, than piip God.ana ngangk min ke'yumpiythan nunanga, ya'a.

⁹ Puth niiyaniy-a, niy ke'-ngul wayan iyy-iiyaniy. Niiy wik God.antaman ngeey-ngeeyaniy, nil puth Ngeen-Wiy Min God.antam anana ngangk niiyantamang wun-wunana. Puth than pam wanch al-alangan Ngeen-Wiy Min God.antam anana ke'aman ngangkangan pi'-pi'antan-a, than pam wanch anangana Jesus Christ.antam ya'a. ¹⁰ Kemp ngamparam inangan-a, mul ngul wun-wunayna, ngeenam puth e? way yotan yump-yumpanampana, anpalana. Puth nil Jesus Christ.ana ngangk ngamparang ing pekan wun-wuniywey-a, yaa, ngangk ngamparamaniya an nungant epa God.anta, a'ngulana ngamp anman aak nungantang wun-wunāmp, puth nil God.angana way ngamparam anangana kan kon-ngath nunanga. ¹¹ Nil Ngeen-Wiy Min God.antamana ngangk ngamparang ngul wun-wunana, niliya Jesus Christ.an mulaman ekathana. Puth nanpalana, nungkway kemp ngamparam inangana mul wun-wunayn-a, nil God.angan kemp ngamparaman mulaman ngul ekathow thamp.

¹² Niiyalang, ngurp ngatharam-ang, niy wik inangan ngeeyān a! Ngamp way anman ke' iyy-iiyāmpa, ya'a, ngamp Ngeen-Wiy Min God.antaman wik ngeey-ngeeyāmp a! ¹³ Puth ngamp way anman yump-yumpimpan-a, nil God.angan ngampang aak umpuyangam kuchow ngul; puth ngamp Ngeen-Wiy Min God.antaman wik ngeey-ngeeyimpwey nunangan-a, ngampana wayana ke'-ngul iyy-iiyimp, ya'a, a' ngampana God.antang ngul wun-wunāmp aak umpuyangam. ¹⁴ Ngamp wee'-wee'anangan Ngeen-Wiy Min God.antaman wik ngeey-ngeeyanamp nunangan-a,

an ngamp kan-kanam paththam pam wanch God.antama.
¹⁵ Ka'athaman ngampan winynyang mo'-mo'amp nungantam God.antamana, amanamaniya nil Ngeen-Wiy Min God.antaman nganggang ngoonch ngamparangan. Nilana ke'am winyathan ngampang, ya'a, nilan thawan ngampar, “Niiy nhengk God.antam ngul iiy-iyaniya” — amanaman-a, ngampan puth ngangk minangam thawanamp nungant God.antana, “Piip nganttam-ang!”
¹⁶ Ngamp puth kan-kanam mee'miy ngula ngampana puk God.antama puth nil Ngeen-Wiy Min God.antam alangana ngangk ngamparamangan wun-wunana, an nil waa'-waa'an ngampar. ¹⁷ Ee'a, ngamp puk nungantam ngul iiy-iyanampa, an ngampiya ngul uwāmp way min mininiy anangan nil God.angan thee'ow Jesus Christ.antan a' ngampar thamp puk nungantamakana. Than pam wanch anangan way-wayam paththam iiy-iyyin nungant Jesus Christ.antan aak ingana. Than ngampar thamp way iiy-iyyantan puth ngamp Christians iiy-iyanampa. Amanamana, ngamp aak minang God.antamang wun-wunāmp karpam nungantang Jesus.antanga.

Ngamp Mee'miyweya Ngamp Ngulana Aak God.antangan Wun-Wunāmp Ngula

¹⁸ Ngamp aak min God.antangan ngulan wun-wunāmp-a, aniy ngampa min-min ngul thiichāmpana an kan-kanam paththam nil God.an wuut pi'an a' min-minam paththama. Puth amanamaniya, kuchekangan ke'-ngul wampow ngamparana than wayan iiy-iyyin ngamparana, aak way thakan wamp ngamparana.

¹⁹⁻²¹ Aak ka'athaman-a, nil God.angan aak inan min yump. Puth pam wanchangan ke'am wik ngeey-ngeeyin nunang, God.an ya'a, than way anman iiy-iyiina.

Amanamana nil God.an thaw, “Aakan kan-ngul wayaman.” Nilan puth ngaantam-ngeey nungantakamana ngul-ngulana aakan koyam min ngul wun-wunowa. Aak an-aniyangana nil God.angan ngul meenathow thanang pam wanch anangan than wee'-wee'anangan pam wanch nhengk nungantamana. An aak umyompanamana kuup-kuupantan nungant. Amanaman-a, aak inan ke'-ngul wayamow, kathamow thakana, ya'a, minam anman ngulakam wun-wunow ngula, ke' nil God.angan pam wanch nungantam anangan thamp min ngul yump-yumpow thanang aak umpuyangama.

²² Aak nathpalman-a, puth in-inmana an ke' way min ma'mangkaman aak ingana wik thamp wun-wuntana, thaa'-eench-eechantan ke' wancha puk kalanakana, puth kuup-kuupantan nungant God.antan nil yipam koyam aak inan min paththam ngul yumpowa. ²³ A' puth ngamp Christians inangan thampa, an ke' ngamp thamp thaa'-eench-eechanamp, ngamp puth kuup-kuupanamp thampa. Puth nil God.angan Ngeen-Wiy Min nungantaman kuch ngampar ngamp yipam mee'miy ngamp ngulana aak God.antangan wun-wunāmp ngampaniy putha puk nungantam ngula. Aak an-aniyangana nilaniya kemp thonangan ngul thee'ow ngampar min paththam, ke'-ngulan weech-weechow a' putha ke'-ngulan uth-uthamāmpa. Puth ngampaniy yippaka kuup-kuupanamp. ²⁴⁻²⁵ Ngamp ngangkan ka'athaman thee'amp nungant Christ.antan-a, an ngamp yotaman ke'am yippak uwamp nil ngulan epa thee'ow ngampara, kemp nyiingkanam thakana. Ngamp mee'miya aak ngulan uwāmpana, puth ngampan kuupāmp yippaka, ngangk minangam ke' yippak eenchāmpa! Ngamp kemp nyiingkanaman uwāmpan-a, ngampan ke'-ngul kuup-kuupāmpa, ya'a.

²⁶ Putha inan thampa, nil Ngeen-Wiy Min

God.antamangana ngangk thay-thayanathan ngampang. Puth wiyiy ngamp-a, ngangk way wun-wunanampa, a' wiyiya ngampa ke'am ngaantam-ngeey-ngeeyanamp ngamp want-wanttakan thawāmp God.antana, puth ngeenakan thak engkāmp nungantana — puth nil Ngeen-Wiy Min God.antaman nil ngangkangan wun-wunan ngamparangan-a, nila mee'-wuth-wuthanaman ngampar God.antan thaw-thawan, ma'-mupam, nilan wik paththaman ke'am thaw-thawan, nil ngangkam anman thaw-thawan nungant God.antan. ²⁷ Puth nil God.angan ngangk ngamparaman kan mee'miy nila, a' nil thiichan nil Ngeen-Wiy Min nungantamana ngeenakan kaangk thawow nungant ngamparakana, pul puth karp anman ngaantam-ngeey-ngeeyanpul, ke'-paal nil Ngeen-Wiy Min nungantaman ngeenakan thawan nungant God.antan-a, an nil God.angan anman thampa ngaantam-ngeeyana.

²⁸ Ngamp wee'-wee'anangan kaangk nungant God.antan-a, nil puth ngangk minangam anman iiy-iiyan ngamparana. Ngamp puth pam wanch nungantam, nil ka'athaman mi' ngampang woyan nungantaman wak-wakāmp. Yaa, puth ina, ngeen nathwey wampow ngampar-a, nath mina, nath ya', way nath wampow ngampar-a, nil God.angan ma'-aath-aathan ngampangana, a' an puth min ngamparana yimananganiy wamp-wampayn ngamparana, ngamp puth God.antan kaangk wun-wunanampa. ²⁹ Aak keenkan-a, ngamp ke'an yippak aak-ngeey-ngeeyamp-a, nil God.angan ngampang ep mee'miy, a' nilan puth thaw ngul ngamp inangan puk nungantaman iiy-iiyanamp. Pam nhengk nungantaman Jesusa an nil puk pam kaa'-ngeecham puth ngampiya mangk nungantang ngul aak ngeey-ngeeyampa. ³⁰ Nil anman ka'athamana

ngaantam-ngeeya ngamp puk nungantaman iiy-iiyāmpa, a' nil ngampangana umpan wampāmp nungantana, a' ngampana wampamp nungant ngula. Nilana way ngamparaman ke'-ngul ngaantam-ngeey-ngeeyow, a' anpalaniya nilan ngul kalow ngampang aak min nungantamaka angan wun-wunāmp nungantangana.

Nil God.angan Nhengk-Kunchan Ngangk Minangam Kuch Ngampar

³¹ Ngamp kan-kanam ngul thiichampana nil God.an kan-kanam paththaman ngamparang iiy-iiyana: an puth wee'angam way-wayathiy ngampangan a? An ya'a!
³² Puth nil God.angan puk nhengk nungantaman ke'am week ngampar, ya'a, nilan kuch nunang ngamparaniya pam wanch yotamantan nil yipam uthamowa. Nil nhengk-kunchan ngangk minangam kuchan ngamparana — yaa, nil yimananganiy way min thakan ngangk minangam thee'-thee'ow ngamparana, ma'-aath-aathow ngampang thakan. ³³ Nil God.an puth ka'athanam ngampangan kan mi' pam wanch nungantaman iiy-iiyāmpana, a' nilaniya way ngamparaman ke'-ngul ngaantam-ngeey-ngeeyow — puth nil wee'wey iiyiy nungant a' way waa'-waa'iy ngampangan a? An ya'a!
³⁴ Ngul wee' thawiy nil God.angan ngampang kuchow aak wayakan a? An ya'a! Nil Christ.an utham ngampar — anpalmana, nil God.angan koyam mulaman ekathan ngul anpalmana pul karp ngul ma'angam pi'-pi'anpul ngampanga. Nil Christ.ana thaa'-pant thaw-thawan ngamparaman nungant God.antana.

³⁵ Nil wee'angam yaarkathiy ngampang ma' Jesus.antam anpalana? An ya'a! Nil puth kaangk paththam wun-wunan ngampar. Wiyiy natha aak way nath wampiy ngampara; wiyiy natha weechiy

ngampang; wiyiy natha ngangk way-wayam paththam wun-wunimpa; pam wanch wiyangan nath way waa'iythan ngampang; than nath kulak wenkiythan ngampar aak-ya'angweya; ngamp nath meech iyy-iiyimp, than wiyangan nath piikiythan ngampang a' puth mulathiythan ngampangwey – puth nungkway way inangan wampiythan ngamparan-a, nil puth Christ.an anman kaangk paththam wun-wunan ngampara, an than ke' yaarkathiythan ngampang ma' nungantam anpalan, ya'a. ³⁶ Way inangan wamp-wampayn ngamparan-a, in ke' wik inangana lat ngench thayanangan ump-umpin aak keenkan:

“Than pam wiyangan kaangk piikayn ngampang, a' mul-mulathayn ngampanga, puth ngamp inangan pam wanch God.antam iyy-iiyanamp;

thanan ngaantam-ngeey-ngeeyantan ngampang ke' minh sheep yimanangan mul-mulathayn ngampanga.”

³⁷ Puth nungkway way inangan wamp-wampantan ngamparan-a, ngamp puth woyan God.antaman ke' wantāmpa, ngangk thayanam iyy-iiyāmp woyan min God.antam anman wak-wakāmp, puth nil Christ.angan ma'-aath-aathan ngampang a' nilan putha kaangk wunan ngampar. ³⁸⁻³⁹ Ngay puth kan-kanam mee'miy nil God.angan ke' wantiy ngampang, nil kaangk anman wun-wunan ngampar, ngamp inangana, pam wanch nungantam Jesus Christ.antama. Ngamp nath uthamimpwey-a, nath ya'a, man-yetham nath iyy-iiyimpan-a, an nil kaangk paththam wun-wunan ngamparana, Christ.aniya. Nungkway oony way thakan wamp-wampiythan ngamparan-a, an ya'angam, an than ke' yaarkathiythan ngampang ma' God.antam anpalana, ya'a. Nil puth kaangk paththam wun-

wunan ngampar. Nungkway ngeen nathan wampiy ngampar inmanwey-a, a' putha ngeen nathan wampiy ngampar aak ngul-ngulan-a, an ngamp mee'miya nil Christ.an kaangk paththam wun-wunan ngampara. Aak wanttinakan iyy-iiyimpan-a, aak achantangakwey-a, nathwey pekam-a, nathwey kaaw-a, nathwey kuuw-a, nathwey kungk-a, nathwey yiip iyy-iiyimp-a, ngamp kan-kanam mee'miy ngul nil Christ.an kaangk paththam wun-wunan ngampar. Puth pam wanch yotama aak ingan wun-wunāmp-a, puth way min ma'mangkam God.angan yump thanang-a, than yot il-ilangana ke' yaarkathiythan ngampang ma' God.antam anpalana, ya'a, nil puth kan-kanama kaangk paththam wun-wunan ngamparana.

9

Nil God.angan Aak Keenkan Mi' Thanang Jews Anangan Pam Wanch Nungantaman Iiyayna

¹⁻² Ngayaniya ngangk way wun-wunang pam wanch Jews kampan ngatharam al-alantamana. Ngay puth pam Christiana, ngay niyant ke'am wik uuy-uuyamang, ya'a. Ngay kan mee'miya a' puth nil Ngeen-Wiy Min God.antamana nilan ngangkangan yam pekan ngoonch ngatharangan-a, nilaniya mee'miya thamp ngay wik inangan kan-kanaman thaw-thawang. ³ Ngayiya ngangk way-wayam paththam wun-wunang thanttama nil puth God.angan aak wayakan kuchow thanang. Ngay kaangk nil ngayangan ep kuchiy aak thanttam anpalaniya aak wayakana, thananiya ya'a, nil yipam kaa'-piichanathow thananga, thananiya kampan ngatharama!

⁴ Nil God.an ngangk minangam iyy-iiy thant, Jews al-alantan. Aak keenkan nil mi' thanang pam wanch nungantam iyy-iiyayn; a' nilana puk nhengk nungantam waa' thanang; nil thantan meenath nil thayana

a' pi'an paththama puth mina paththaman; nil wik thayan nungantaman want thant; nilan thaw thant than want-wanttakan thaa'an-kuump-kuumpayn nunanga; a' niliya kaa'ngak thanang aak min ngulan wampow thanta.
⁵ Than wuut mangk thanttamana, inangana, Abrahama, Isaaca, a' putha Jacoba; a' nil Christ.an aak iikanak ngulan wamp-a, niliya pam Jew wampa. Nil Christ.ana, moom pi'an ngampar yotamantana. Ngamp thaa'-kuump-kuumpâmana, ngulakama! Yey, kan-kanama!

⁶⁻⁹ Than pam wanch Jews wiy al-alangan ke'am monkan-wakantan nunang God.an, ya'a. Nil God.an ka'athaman wik min thaw nungant Abraham.antan, ngul nil muukamath nunang ey? An ya'a, nil God.an kan-kanaman thaw nungant, puth pam wanch Jews wiy anangana ep pam wanch God.antam iyy-iiyantana. Nil puth God.angan nunang Abraham.an kaa'ngakan nil puk wuut ngulan thee'owanta, nil thaw nungant, “Kaap thonang ngulan-a, ngay ngul meenathāng nungkara ngayiya pi'an paththama, nil Sarah.angana puk wuut ngul kalowa.” A' amanamaniy-a, nil Sarah.angan puk wuutan kan-kanam ngul kal, Isaac.an. Anpalana nil God.ana nungant Abraham.antan thaw, “Than puk Isaac.antam anangana a' puk thanttam al-alantamana, puth puk thanttam ngulan aak-ngeey-ngeeyayna, nil yimanamana, than al-alanganiya ngayang ngul wik ngeey-ngeeyayna ke' nintan ngayang wik ngeey-ngeeyangana, than wiy al-alangan ep ya'a, than wik ke' ngeey-ngeeyayna.” Than kampan Abraham.antam yotaman pam wanch God.antam ya'a, than puungk wiy anangan ep Isaac.antamana, puungk wiy ananganiya ya'a, Ishmael.antamana.

¹⁰ Inan thampa pulantamana, puk pul um kucham inangana, Esau-a, puth Jacob pula, puk Rebecca.antamana. Piip pulantamana Isaac.ana, wuut mangk ngampara-

mana. ¹¹⁻¹² Pul ke'aman yippak aak-ngeeypul-a, nil God.angan waa' nungant Rebecca.antan, “Nil wuny-kunchana pont-kunchantan work iyy-iiyow, nil pont-kunchana moom iyy-iiyow nungant.” Ngul nil God.angan pont-kunchan min thathan ey? An ya'a! ey! Ngul wuny-kunchan way thathan ey? An ya'a! Pul ke'aman yippak aak-ngeeypul-a, nil God.angan thonam anman ep mi'ana nil monkanan-wakow nunangana. An puth God.ant aak nung-nungant wunana, kaangk nil pam wanch wee'-wee'anangan mi'ow thanangan-a, aniya, nilaman mi'ow thanang than yipam monkan-wak-wakayn nunangana — than min ke'am iyy-iiyantana, anpalman, ya'a, nil-nilam piip God.angan kaangk mi'ow thananga. ¹³ Nil God.an wik inan thamp thaw lat ngench thayanangana, “Ngay kaangk nungant Jacob.antana, puth Esau.antana ya'a.”

¹⁴ Ngul nil God.an way iyy-iiyant Esau.antan ey? Ya'a!
¹⁵⁻¹⁶ Nil piip God.ana nil-nila, pam pi'an paththama, nilaniya ep thawow nil wee'-wee'antan kaangk minan iyy-iiyow. Than pam wanch wiyangan nath ngaantam-ngeeyiythan thanttakamana thanan ke' pam wanch min iyy-iiyantana, puth ya'a, thanan nunang piip God.an ke' thaachiythan nunang nil minan iyy-iiyow thantana, an ya'a. Puth nil God.an thaw nungant Moses.antana, “Ngay kaangk wee'antan min iyy-iiyāng-a, an ngay ngangk min iyy-iiyāng thantana; ngay wee'-wee'anangan kaangk ngangk mam-mamāng thanangan-a, ngayan ngangk mam-mamāng thananga. Ngayaman ngul ngaantam-ngeeyāng.” ¹⁷ A' lat ngench thayanangan wik inan thamp waa'-waa'ana, nil God.an King Pharoah.antan thaw, “Ngay puth nintang pam pi'an yumpanga, than pam wanchangan yipam thathayn ngay pi'an a' thayan paththama, a' puth amanamana, than pam wanch aak nath-nathan wun-wuntan-a, ngaantam-ngeey-ngeeyayn

ngayang ngayam thonakam God.ana.” ¹⁸ An kan-kanama, nil God.an kaangk wee'-wee'antan minan iyy-iiyow-a, nilana ngangk minangam iyy-iiyow thantana; nil wee'-wee'antan kaangk min ke'an iyy-iiyow thantan-a, an nil-aman thawow thantana mak way iyy-iiyayna, pam wanch anangana.

Nil God.an Kaangk Want-Wanttakan Yumpow Pam Wanchantan-a, An Nil Yumpow

¹⁹ Niiy nath ngaantam-ngeey-ngeeyaniy niiyantakama, “Ngul nil God.angan ngeenak waa'-waa'an ngampangan e? Pam wanch wiy anangana thaach-thaachan thanang way yump-yumpayna; wiy ananganiy-a, thaach-thaachan thanang min yump-yumpayna. An puth nilam thaach-thaachan ngampanganiya, nil puth ngampangana wayan ke' waa'-waa'owa.” ²⁰ Puth ngamp ke' ngaantam-ngeey-ngeeyāmp nunang yimananganiya! Nil puth ngampangan yumpa, nil pi'an paththam iyy-iiyan, God.ana. Ngampana ke' thawimp nungant, “Nint ngul ngeenak yumpan ngayang yimanangan a?” ²¹ Inan ke' aak yimanangan wun-wunana: nil pamangwey yuk the' anangan yump-yumpiy pipamana, a' nilamana ngaantam-ngeey-ngeeyiy nil yuk the' anangan ngeenak ngul yump-yumpow thanang. Nil pipan maayana, a' kaangk nilweya, nil yuk the' kucham yumpiya, thonaman-a, mayan wunp-wunpow, nil thonaniya, wook way anangan wunp-wunpow. ²² Inan aak God.antan yimanangan thamp wun-wunan. Nilan kaangk want-wanttakan pam wanchantan yump-yumpow-a, an nil yumpowa. Pam wanch wayanang al-alantan-a, niliya kuup-kuupan thantaniya, nilan meenathow nungamanga nil thayan paththama, man kul ngulan wampow nungant thantakana. Nil kaangka erkam kuchow thanang aak way aakanakana,

puth ya'a, nil kuup-kuupan thanta. Ngul-ngulana nil kuchow thanang.

²³⁻²⁴ Nil thamp kaangk meenathow nungamang ngampar Christians. antana nil min-minam paththama, nilana ngangk mam-maman ngampang. Nilan aak nathpalman mi' ngampang pam wanch nungantam iiy-iiyāmpa. Nil ngulan kalow ngampang aak min nungantamangan wun-wunāmp. Ngamp wiyiya Jews, wiyiya Jews ya'a. ²⁵ Wik inangan kan-kanam wun-wunan thantan pam wanch Jews ya' al-alantana, puth nil Hosea. angan aak keenkanamana wik inangan umpa lat ngench thayanangan:

“Ka'athamaniya, than pam wanch wiy anangana pam wanch ngatharam ke'aman iiy-iiyina, ya'a, puth yimanang ngulana, an epa ngay pam wanch ngatharam ngul waa'-waa'āng thananga.

Ka'athamana ngay ke'am kaangk wunangan thantana, puth yimanang ngulana an ep-paththama ngay kaangk paththam wun-wunang thanta.”

²⁶ A' nil Hosea. an wik inangan thaw thamp:

“Ka'athaman nil God. an thaw niiyant, 'Niiy pam wanch ngatharam ya'a.’

Puth nilana ngul thawow niiyantana, 'Niiyan kan-kanam pam wanch ngatharam iiy-iiyaniya.

Ngay God inman man-yetham anman wun-wunang aak umpuyangamana.’ ”

²⁷ A' putha aak keenkanamana, nil Isaiah. an wik thayan inangan thaw lat ngench thayanangana:

“Nungkway than pam wanch Jews thaa'-wantanam wun-wuntan-a, yot-yotam paththam ke' aak ngaanh thompam yimanangan-a, nil piip God. angana chil-chil anangaman kaa'-piichanathow thananga.

²⁸ Nil kan-kanam pam wanch yot-yotam anangan aak wayakan kuchowa,
a' nilan yaaman ke' kuup-kuupiya.”

²⁹ A' nil Isaiah.ana wik inangan thamp thawa aak keenkan:
“Nil God pi'an alangana ngampang Jews ko'alam inangan ep kaa'-piichanath.

Nil nath ke'wey kaa'-piichanathiyana, ngamp yotaman uth-uthamimp ke' than pam wanch aak Sodom punchanana a' putha aak Gomorrah punchanan ma'mangkam uth-uthamina.”

*Ngay Kaangk Paththam Nil God.angan Kaa'-Piichanathow
Jews Kampan Ngatharam Anangana!*

³⁰ Ngay wik inangan koochanathang niyant. Ka'athamana, than Jews ya' al-alangan kaangk ke' ngeey-ngeeyayn woyan piip God.antaman want-wantakan wun-wunana. Amanamana, than wiyangan ep ngangk thee'in nungant ngul Jesus Christ.antan a' nil God.angan way thanttaman ke'-ngul ngaantam-ngeey-ngeeyan ngula.

³¹ Than puth Jews.angana ngaantam-ngeey-ngeeyin thanttakamana, “Ngampwey wik thayan ma'mangkaman pi'-pi'impwey-a, nil God.angan ke'-ngul way ngamparaman ngaantam-ngeey-ngeeyow, ya'a.” Thanan ke' wik thayanan pi'-pi'iythan-a, an puth ya'angama, puth wiy anangana pip-pipantana.

³² Than woyan God.antamana ke'am uwin, ya'a. Puth nil God.an yimanangan ke'am thaw, “Niiy wik thayan ma'mangkaman pi'-pi'inwey-a, ngay way niyantaman ke'-ngul konangaman pi'-pi'ānga.” Aak God.antaman yimanangan ke'am wunan, ya'a. Nil wik inangan ep thaw, “Niiy ngangk ngatharan thee'ānan-a, a' wik ngatharam anangan kan-kanam ngangkangam pi'-pi'ān thanangan-a, yaa, ngayan way niyantamana ke'-ngul

ngaantam-ngeey-ngeeyānga, ya'a.” Nil Jesus.an uk aak iikanakan-a, thanan man-ngeeyin nunang nil puk nhengk God.antaman ke' ya' yimanangan niliya, than ke'am ngaantam-ngeey-ngeeyin nunang nil ngulan kaa'-piichanathow thanang way thanttam anpalana. Nil Jesus.ana ke' kunttow wuut pi'an yimanangan wunwun thanta, woyan um-menhangana. Than woyan wakanan iyy-iiyantanan-a, than kunttowangana tha' thuth-thuthantan, a' keek-keekantan ngula. Than putha woyan min God.antamana ke'am uw-uwantan. ³³ Wik inangan kan-kanama, puth wik inangan lat ngench thayanangan waa'-waa'ana:

“Ngay pam ngul wunpāng aak namp Zion angan, aak Jews.antamang pam ke' kunttow yimanangan.

An ke' than pam wanch wiy anangan tha' thuth-thuthantan kunttowangan a' keek-keekantan ngul.

Puth than wee'-wee'ananganweya ngangkangan pi'-pi'antan nunangan-a,

nilana kan-kanam ngul kaa'-piichanathow thananga.

Nil ke' muukamathiy thanang, ya'a,

than ngangk minangam kan-kanam paththam ngul iyy-iiyayn nungantangan.”

10

¹ Ngurp ngatharam-ang niyalang, ngay kaangk paththam nil God.angan kaa'-piichanathow Jews kampan ngatharam ananganwey a! Ngay ma'-yotam mee'-wuth-wuthanamang thantana. ² Ngay mee'miy thanan kaangk God.an monkan-wakayn nunanga, puth thanan woyan nungantaman ke'am thiichin ya'a. ³⁻⁴ Woyan God.antaman yimanangan wunana: nil God.angan Christ.an kuch nunang ngamparana, a' nil epa wik thayan

ma'mangkaman pi'-pi', God.antaman. Nilam thonakam minam iyy-iiy aak inganiya mee' God.antangana. Than wee'-wee'anangan ngangk thee'-thee'ayn nungantan-a, nil God.angan ngul kaa'-piichanathow thanang way thanam anpalan thanan yump-yumpantanweya. Puth than Jews al-alangan wik inangan kaangk ke' ngeey-ngeeyayn, thanan kaangk ke' ngangk thanttaman thee'ayn nungantana. Than puth ngaantam-ngeey-ngeeyantan thanttakaman thanaman min ngul iyy-iiyayna, puth an ya'a.

Than Wee'-Wee'anangan God.an Ngangkangan Pi'-Pi'antan Nunang-a, Nil God.angan Ngul Kaa'-Piichanathow Thanang, Jews-a, Puth Jews Ya' Anangan

⁵ Nil Moses.angan wik inangan waa'-waa' keenkanamana lat ngench thayanamana, “Than wee'-wee'anangan wik thayan ma'mangkam God.antaman pi'-pi'ayn-a, thananiya aak piip God.antang ngul wun-wunayn.” Puth nil wee'angam wik thayan ma'mangkam God.antaman ngeey-ngeeyow e? An ya'a! ⁶ Nil puth God.angan thanang anangaman ep kaa'-piichanathow thanang than nunangan ngangkangan pi'-pi'antana. Niiy yimanangan ke' thaw-thawāna, “Nil wee'-nathwey matow aak-aakanak kenjana nunang Christ.an palam ukathow nunangan e?” An ya'a! Nil puth kan wamp ngampar ey! ⁷ A' niyana putha ke' thaw-thawāna, “Nil wee'-nathwey pekam ukow nil yipam Christ.an mulaman palam ekathowan e?” An ya'a! Nil mulaman kanam ek ey! ⁸ Ngamp woyan God.antaman kan mee'miy ngul. An puth ngamparana thayan paththaman ke' wun-wuniya, ya'a. Ngamp wik God.antaman waa'-waa'āmp ngamparakamana putha ngaantam-ngeey-ngeeyāmp thampa. Puth wik inangan wik anman Christ.antamana

ngan niyant ngulan waa'-waa'anang puth thant wiyantan thampa. ⁹ Niiywey kan-kanaman ngaantam-ngeey-ngeeyinana nil God.angan Jesus Christ.an mulaman ekath nunang-a, a' puth-a, niy wiyantan wikan waa'-waa'in nil Jesus.aniya moom pi'an ngamparaman-a, yaa, nil God.angan ngul way niyantam amanamana kaa'-piichanathow niyang. ¹⁰ Nil puth God.angan way ngamparamana ke'-ngul ngaantam-ngeey-ngeeyow ngamp wee'-wee'anangan Christ.an ngangkangan pi'-pi'anamp nunanga, a' putha wik min thant wiy al-alantan waa'-waa'anamp ngula. ¹¹ Lat ngench thayanangan inan waa'-waa'ana:

“Than wee'-wee'anangan God.an ngangkangan pi'-pi'antan nunang-a,
an nil kan-kanam ngul kaa'-piichanathow thanang, an nil ke' muukamathiy thanang, ya'a.”

¹² Puth wik inangana, Jews al-alantan thonakam ya'a, puth thant wiy al-alantan thamp Jews ya' anangan-wey. Nil God thonam anman ngamparana pam wanch aak umyompanamangan wun-wunanamp. Than wee'-wee'anangan thaw-thawayn nungant God.antan ma'-aath-aathow thanangan-a, nilana ngangk minangam iyy-iyyow thanta, ¹³ puth lat ngench thayanangan waa'-waa'ana:

“Nil wee'wey thawiy God.antana, ‘Piip God-ang! nint ngayang ke' kaa'-piichanathin ngayang ey?’

A' nilana kan-kanam ngul kaa'-piichanathow nunang way nungantam anpalana.”

¹⁴ Puth pam wanch wiyangan nath Christ.an ke'am ngaantam-ngeey-ngeeyantan nunang nil ngulan kaa'-piichanathow thanangan-a, an puth want-wanttaka thawayn nunganta nilan yipam kaa'-piichanathow thanangan e? A' puth than nathwey wik God.antaman ke'aman

ngeey-ngeeyin-a, thanan puth want-wanttak ngaantam-ngeey-ngeeyiythan nunang nil ngulan kaa'-piichanathow thanangan e? A' putha than pam wanch wiyangan ke'an wik min God.antaman waa'-waa'iythan thantanwey-a, an puth want-wanttak wik ngeey-ngeeyiythan e? ¹⁵ Nil God.angan pam wanch ke'an kuchiy thantana, an thanan wik min nungantaman want-wanttak waa'-waa'iythan thantaniy e? Nil God.angan pam wanch kan kuch thanang than yipam wik min nungantaman pam wanch wiy al-alantan waa'-waa'ayn thantana, puth lat ngench thayanangan anman waa'-waa'ana, “Than wampantanana wik min God.antaman waa'-waa'ayn ngamparan-a, inan min paththam wunan ngamparana.” ¹⁶ Puth than pam wanch wiyangan wik min God.antaman kanam ngeey-ngeeyina, puth than ke'ama ngangkan thee'in nungant Christ.antana. Wik inangan kan-kanam paththama, nil puth Isaiah.angan lat ngench thayanangan umpa, “Lord-ang! than wee'-wee'anangan wik min nungkaraman ngangkangaman pi'-pi'antan e? wik ngayan waa'-waa'ang thantan e? Than chil-chil anangaman thonakam a!” ¹⁷ Than anangaman ngangk nungant Christ.antan thee'-thee'in-a, than ka'athaman wik nungantaman ngeey-ngeeyin pam wanch wiyangan waa'-waa'in thantana.

¹⁸ Than Jews yotamanga ngangk ke'am thee'in nungant, Jesus Christ.antan ya'a. Ngul thanan wik min nungantaman ke'am ngeeyin ey? Ya'a, than wik min nungantaman kanam ngeeyina, puth wik inana lat ngench thayanangan waa'-waa'ana:

“Than pamangan wik min God.antaman pal-puy waa'-waa'ina aak umyompanamana,
wikana kan-ngul we'aramana.”

¹⁹ Ngul than Jews al-alangan wik ke'am thiichin ey? Ya'a, an than kanam thiichina, nil puth Moses.angan wik God.antam inangan waa'-waa' thanta:

“Niiyiy thonakam ngaantam-ngeey-ngeeyaniya than pam wanch aak thonangan wun-wuntanan-a, wik God.antamana an ngoongk-ngoongkamweya a' way paththam iiy-iiyantana.

Ngay puth pam wanch wiy anangan thananga ngay ngul umpāng pam wanch ngatharam ngul iiy-iiyayna, puth anpalmana niiyana man kul ngul wampow niiyant, a' mee'-wun-wunān thantana.”

²⁰ Puth aak keenkanamana nil Isaiah.an wik inan thamp thaw lat ngench thayanangan, Jews ya' anangan waa'-waa' thanang. Nil wik thaa'-thayanam thaw, wik inangan God.antamana:

“Than pam wanch wiyana ke'am wenk-wenkin ngatharana,

puth than ngul-ngulana epa uw-uwayn ngayangana.

Than pam wanch wiyana ke'aman thaw-thawin ngathara ngay kaa'-piichanathāng thanangana, a' ngul-ngulana ngayana wampāng thanta.”

²¹ Puth nil God.ana, wik inangan thawa, Jews anangan waa'-waa' thanang:

“Ngay ma'-yotam thaa'-mamanang thaw-thawang niiyant monkan-wak-wakān ngayang, puth ya'angama,

puth niiyana kaangk ke' ngatharamana, niiy ngayangana thaamp-thaampaniy anman.”

¹ A' nil God.angan kan want thanang Jews ananganwey ey? An ya'a! Puth ngay yimanang thamp Jawa, nil Abraham.ana wuut mangk ngatharama, a' ngay amanaman wampangan Benjamin.antam iniya. ² Nil God.angan Jews anangan ke'am want thanang, nilan mi' thanang pam wanch nungantaman iyy-iiyayna. Niiy puth wik inangan mee'miy nil Elijah.an keenkanaman thaw God.antan lat ngench thayanangan waa'-waa'an ngampar. Nil pam wanch Jews kampan nungantam anangan waa'-waa' thanang, nilan thawa, ³ “Lord-ang! than Jews il-ilangan prophets nungkaram anangan mul-mulathin thanang a' than altars nungkaram anangan minh kiingkanakana way-wayathin ngula. Ngay puth thonamang nintang epa wikan ngeey-ngeeyanga, thanan puth ngayangan kaangk mulathayn thampa!” ⁴ Nil God.an thaw nungant, “Ya'a, nintam thonakam ke'am ngayangan monkan-wak-wakangana. Than pam wanch seven thousand anangan yippak woyan ngatharaman wak-wakantana, than yuk ngeen-wiy namp Baal.ana ke'am monkan-wak-wakantan nunang, an ya'a.” ⁵ In-inman yimanaman wunwuntan a! Than Jews wiyangan epa God.an monkan-wak-wakantan nunang nil puth mi' thanang than yipam pam wanch nungantam iyy-iiyayna, nil ngangk minangam iyy-iiyan thanta. ⁶ Nil God.an wik inangan ke'am thaw thant, “Niiy wik thayan ngatharaman pi'-pi'ān-a, yaa, ngay puthangkana pam wanch ngatharam ngul waa'-waa'āng niiyang.” Nil God.ana yimanangan ke'am thaw. Aak nungantana yimanangan wunana: nil pam wanch wee'-wee'anangana kaangk mi'owan-a, yaa, an nil mi'an thanang, a' way thanttaman ke'-ngul ngaantam-ngeey-ngeeyana, nil puth min anman iyy-iiyan thantana.

⁷⁻⁸ Than Jews yot anangan ke' woyan min wakiythan God.antamana, puth ya'a, thanan puth God.an ke'am

ngaantam-ngeeyin nunang nil min-minam paththamana. Than wiyangan woyan God.antamana ke'am uwin, than ko'alamangana an epa uwinweya, nil puth God.angan mi' thananga pam wanch nungantaman yipam iyy-iiyayna. Puth lat ngench thayanangan waa'an, "Nilam God.angan kuchek thinhanan yump-yump thanang, thananiy putha ke' mee' ko'ancha a' ke' weenth yimanangan iyy-iiyin woyan God.antamakan, ke'am puth uw-uwin." Than aak nathpalman yimanangana iyy-iiyantana, a' in-inmana.
 9 Nil David.angana wik inangan thamp ump lat ngench thayanangana, aniya thanangan waa'-waa'a:

"Than pam wanchangana may pi'an thakan yump-yumpantan,
 than ngaantam-ngeeyantan ke' than piip God.an thaa'-kuump-kuumpantan nunangana,
 puth ya'a, an than yaan muukamantana.
 Puth amanamana, ngay kaangk nil God.angan wayathow thananga,
 ngay kaangk thanana ke' awar pi'anang ang pekan keek-keekiythana, ke' yipam pentiythan ngula.

10 Ngay kaangka nint mee' yiil yumpān thanang than yipam woyan nungkaraman ke' thathiythan ngula, a' putha ngay kaangka aak wayan wampow thant ke' yuk anhanan kal-kaliythan man-mangk thanttaman-gana."

11 Ngul nil God.angan Jews anangan aak umpuyangam wantow thanang ey? anpalman than wiyangan Jesus Christ.an ngangkangaman ke'aman pi'-pi'antan nunangan ey? Ya'a! Nil piip God.angan yimanangan ngaantam-ngeey, "Than Jews il-ilangana ngayangan ke'am ngangkangaman pi'-pi'antan. Puth amanamana ngay woyan ngatharamana ngul meenathāng thant pam wanch wiy al-alantana than Jews ya' al-alantana, a'

than ananganiya ep ngay kaa'-piichanathāng thanang wee'-wee'anangan ngayangan ngangkangaman pi'-pi'antan. Anpalana than Jews anangan nath mee'-wun-wunayn thanta Jews ya' al-alantana a' than ngul nath ngangk thanttaman thee'-thee'iythan nungant Jesus Christ. antana. ¹² Than Jews yotangana ke'am monkan-wakin nunang Jesus Christ. ana, ya'a, puth amanaman nil God. ana ngangk minangam kan-kanam paththam iyy-iyyan thant pam wanch thaa'nganth thon-thonantan, than pam wanch Jews ya' anangan. Puth ngul-ngulana than Jews al-alangan ngangk ngul thee'-thee'ayn nunganta, a' anpalana than pam wanch God. antamana ngangk min paththam ngul iyy-iyyayna.”

Ngay Inan Niiyant Ngul Thaw-Thawang Jews Ya' Al-Alantana

¹³ Ngay inan niiyant ngul thaw-thawang Jews ya' al-alantana. Niiy puth mee'miy nil God. angan ngayangan mi'a, ngay yipam wik Jesus Christ. antaman waa'-waa'āng niiyanta. Ngayana ngaantam-ngeeyanga nilan work min paththam thee'ara. ¹⁴ Ngay nath wik minaman waa'-waa'ing niiyant-a, than kampan ngatharam wiy anangan Jews nath epa mee'-wun-wuniythan niiyantweya a' puth amanamana ngay yipam ma'-aath-aathāng thanangweya than yipam ngangk thanttaman thee'-thee'ayn nungant Jesus Christ. antan. ¹⁵ An puth aak min paththam ngul wun-wunow ngampar a' Ka'athamaniya nil God. angan pam wanch nungantam Jews anangan ya' want thanang a' anpalana nil ngangk min paththam iyy-iyy thant Jews ya' al-alantana. Puth ngul-ngulaniya an ep nil God. an ngangk min paththam ngul iyy-iyyow thant Jews al-alantan a' puth anpalana than ngangk ngul thee'ayn nungant Jesus

Christ.antan, a' puth aak anan min paththam ngul wun-wunow ngampara, an ke' pam wanch Jews anangana mulaman ek-ekantan ngula.

¹⁶ Niiy inan ngeeyāna! Than Jews anangana wuut mangk Abraham.antam wamp-wampina. Nil Abraham.an-a, pam God.antama. Puth anpalana nil piip God.angan mi' thanang Jews anangan pam wanch nungantam thamp iiy-iiyayna. An ke' may breada, may bread manyam nathweya may bread pi'an anpalana aniya piip God.ant-a, an puth ma'mangkaman-a, an God.ant thampa. Yuk mangk yukamany-a, an nathwey piip God.ant-a, puth yuk thampana aniya piip God.anta. Than wuut mangk pam wanch Jews.antamana aniy thana piip God.antama. Puth anpalana than Jews punchanana aniya pam wanch piip God.antam thampa. An than ke' yuk min anan than-thana may thampana. Nil wuut mangk thanttam Abraham.ana ke' yuunch think thanttaman yimanangan a' putha than pam wanch Jews anangan ke' yuk punth yimanangan we'-we'araman nungantam Abraham.antamana. ¹⁷ An ke' aak yimanang ngul wunana: an ke' nil God.angan yuk punth wiy anangana kan pip-pip thanang yuk min amanaman, nil kan want thanang Jews wiy anangan than puth ngangk ke'am thee'in nungant. Niiy pam wanch wiy anangana, Jews ya'ana, an niiy ke' yuk iithangan than-thantan. An ke' nil God.angana yuk punth niiyantam anpalana thuth-thutha, a' mut-thu'-thu' thanang yuk minang angman, Jews al-alantangan. Niiyiya ke' pam wanch God.antam ngul iiy-iiyaniy. ¹⁸ Niiy puth ulp-ulpanangan ke' iiy-iiyāna a' puth ke' ngaantam-ngeey-ngeeyān niiyantakamana ke' niiy pam wanch min niiya, than Jews ke' min ya'a. An ya'a! Niiy ulp-ulpananganwey iiy-iiyaniy-a, niiy inan kan ngaantam-ngeeyāna: yuk punth anangan yuk think

amanaman wampana, puth yuk think anan-a, yuk punth amanamana ke'am we'araman ya'a!

¹⁹ Puth niyan nath thaw-thawina, “Nil God.angana thalokang ump thanang yuk punth anangana, ngampang yipam karpam nenchanathow yuk minang angan aak thanttamangana.” ²⁰ A' ngay wik inan thaw-thawang niyanta: ee'a, nan kan-kanama. Nil God.angan want thanang pam wanch Jews anangana thanan putha ngangk ke'am thee'-thee'in nungant Jesus Christ.antana — niy epa ngangk kan thee'-thee'an nungant Jesus Christ.antan, amanamana niyana nungantang ngul iyy-iyaniya. Niy puth ulp-ulpanangan ke' iyy-iyyān, niy ngangkang anman pi'-pi'ān nunang Jesus Christ.an nil God.angan yipam ke' wantow niyang. ²¹ Nil Jews anangan ka'atham mi' thanang pam wanch nungantam iyy-iyyayna, puth nil want thanang than ngangk nungant Christ.antan ke'a-man thee'-thee'in, an yim-yimananga nil God.anga wantiy ngampang ngamp ngangkangan ke'aman pi'-pi'anamp nunanga.

²² Niiywey Christ.an ngangkangaman pi'-pi'aniy-a, nil God.ana min anman iyy-iyyow niyanta. Niiywey man-mangkaman thee'-thee'in nungant Jesus Christ.antan-a, nilana wantow niyanga ke' nilan want thanang pam wanch wiy anangana. Ngamp kan mee'miy nunang nil min paththam iyy-iyyan ngampar, puth ngamp wayan yump-yumpimp-a, nilaniya thayanamow ngul ngamparamana. ²³ Thon inan thampa, than Jews anangana nath koyaman weentiythana woyan min God.antamakan-a, a' ngangk thanttam thampan thee'iythan nungant Christ.antan-a, nilana pam wanch nungantam puthamana ngul waa'ow thanang. Inan ke' aak yimanangan wunana: nilana yuk punth thuthanam anangana koyam nenchanathow yuk min alantangan.

Ee'a, an nil kan-kanam yumpiy yimananganiya, puth nilan kan-kanamana pam pi'an paththama. ²⁴ Puth niyy Jews ya' inangana niyy ka'athamana pam wanch nungantamana ke'am iiy-iyyan, ya'a, niyyan ke' yuk iithangan than-thantan yimanangan iiy-iyyanweya. Amanamaniya nil God.angana yuk minang angman nenchanath niyyang ngul. Ka'athaman-a, than Jews anangan pam wanch God.antaman iiy-iyyin, thananiya ke' yuk punth yuk min anpalman we'-we'aramin. Nil God.angan nath niyyangwey nenchanathiy yuk minang angmanwey-a, yaa, nilana ma' minang ngul koyaman wunpow thanang punth thuthanam anangan yuk min alantangana.

Nil God.angan Pam Wanch Yotamana Kaangk Ngangk Mam-Mamow Thanang

²⁵ Niiyalang, ngurp ngatharam-ang, ngay kaangk wik nyiinganam inan waa'āng niyyanta, niyy yipam ulpanangan ke' iiy-iyyān niyyantakamana, niyy ke' thamp ngaantam-ngeey-ngeeyān niyy ke' pam wanch min iiy-iyyaniy, Jews anangan ya'a. Puth nil God.angan wik inan ma' mupam pi'-pi', puth ngay in-ngulan wikan waa'āng niyyant: than pam wanch Jews wiy anangan kaangk ke' wik min God.antaman ngeey-ngeeyayna, puth thanana kuchek way thinhan iiy-iyyantan. Puth ngul-ngulana, pam wanch yotam Jews ya' al-alangana monkan-wak-wakayn nunang Jesus Christ.ana. Aak an-aniyangana, than pam wanch Jews al-alangana, than ngulan monkan-wak-wakayn nunang Jesus Christ.an. ²⁶ Anpalan-a, nil God.angan thanang pam wanch Jews yot anangan way thanntam anpalan kaa'-piichanathow thananga, puth wik nungantaman lat ngench thayanangan waa'-waa'an:

“Aak anpalan namp Zion amanaman aak thanntam Jews

al-alantaman nil pam ngulan wampow pam wan-
chan kaa'-piichanathow thanangana,
nil woyan wayamana, woyan minak ngul weentathow
thananga.

²⁷ Aak an-aniyangana ngay kaa'-piichanathāng
thanangana way thanttam anpalan ke' ngayaman
thawangan keenkanamana.”

²⁸ Puth Jews al-alangana thaamp-thaampin nunang
Christ.ana anpalana nil God.angan too want thanang,
niiy yipam Jews ya' inangana pam wanch nungantam
ngul iiy-iiyāna. Puth aak keenkanamana nil God.angana
Abraham-a, puth pam wanch Jews anangan mi' thanang
pam wanch nungantaman iiy-iiyayn nil puth nanpalan
kaangk wun-wunan thant Jewsantan, a' nilan kaangk
ngangk minangam iiy-iiyow thamp thantana. ²⁹ An puth
nilam thaw nilan ngangk minangam iiy-iiyow thantan,
wik inana an nil kan-kanam thaw, nil ke' muukamathiy
thanang, ya'. ³⁰ Niiy Jews ya' il-ilangana, ka'athaman
niiy God.an ke'am wik ngeey-ngeeyan nunangana, ya'a,
puth yimanang ngulana nil God.angan kan-ngul ngangk
mam niiyang, ngeenam putha, than pam wanch Jews al-
alangana ke'am wik God.an ngeey-ngeeyin nunang ya'a.

³¹ Than in-inman wik ke' ngeey-ngeeyantan nunang,
ya'a, puth ngulan ep nil God.angan ngul ngangk mamow
thanang thamp ke' nil niiyangan ngangk mama. ³² Puth
nil God.an thaw, “Than pam wanch yotaman way mak
iiy-iiyayna, ngay yipam meenathāng thant yotamantana
ngay puth kaangk ngangk mam-mamāng thananga.”

Ngamp God.an Thaa'-Kuump-Kuumpāmp Nunanga!

³³ Nil puth God.an ngangk minangam paththam iiy-
iiyan ngampara, a' putha nil kuchek waap min paththam
a! Nil ma'mangkam mee'miya! Ngampana ke' thiichimp

nil want-wanttakan ngaantam-ngeey-ngeeyana, pam nil-nila, pi'an paththam a! ³⁴ Wik inan puth lat ngench thayanang waa'-waa'ana:

“Nil God.an wee'anga thiichiy nunang nil ngeen nathan ngaantam-ngeey-ngeeyan e? An ya'a!

Nil wee' thawiyanta nil want-wanttakan iiy-iiyow e? Ya'anmana!

³⁵ Ngamp yuk way min ngeen thee'āmpant e? An ya'a!

Ngamp want-wanttaka yuk way min yotaman thee'-thee'imp nungantan e? An ya'a!

Nilana epa thee'-thee'an ngamparana.”

³⁶ Puth nilana yuk way min ma'mangkam thee'-thee'an ngamparan a! Nil ma'mangkaman ma' nungantang pi'-pi'an! An puth yuk way min il-ilangana meenathantan ngampar nil God.ana pam pi'an paththama! Ngamp puth yotamangan thaa'-kuump-kuumpāmp nunang aak umpuyangama! Yey, an kan-kanama!

12

Ngamp Ngamparakaman Ke' Weekāmp God.antaman, An Ngampaniya Ma' Nungantang Anman Iiy-Iiyāmpa

¹ Niiyalang, ngurp ngatharam-ang, nil piip God.ana ngangk minangam iiy-iiyan ngampara, a' puth way ngamparamana ke'-ngul ngaantam-ngeey-ngeeyan ya'-ngula. Puth nanpalana, niiy in ngeeyiya! Ngamp ngamparakaman ke' weekāmp God.antamana puth ma' nungantang anman iiy-iiyāmpa, niliya ke' moom ngamparam iiy-iiyow, ngamp yipam min anman iiy-iiyāmp a' God.ana ngangk min yump-yumpāmp nunang ngamp man-yethaman yippak iiy-iiyāmpana. Aak woyan yimanangan wunan ngamparana God.an monkan-wak-wakāmp nunang. ² Than pam wanch way al-alangan woyan wak-wakantanan-a, niiy anana ke' wak-wakāna,

puth ma' God.antang iiy-iiyān nil yipam epankathow niiyang wayamana woyan minaka, min anman yipam ngaantam-ngeey-ngeeyāna, niy yipam mee'miy ngul iiy-iiyān nil God.ana want-wanttakan kaangk niiyan iiy-iiyāna mee' nungantangan, a' putha niy min want-wanttakan iiy-iiyāna, putha niy want-wanttakan God.an ngangk minan yump-yumpān nunang, a' putha niy want-wanttakan woyan God.antaman min-minan wak-wakāna.

³ Nil God.angan work inan thee'ar ngay wik min nungantam inangan waa'-waa'ang niiyantana, puth napan ngay niyant ma'mangkamantan thaw-thawanga: niy-niyaman ngaantam-ngeey-ngeeyāna. Nil puth God.angan pam wanch yot inangan kemp pok-pokkapang yump-yump ngampangana, ngamp puth kemp karpam ke' maka, ya'a — than pam wanch wiyiya, ma'-kunch iiy-iiyantana, wiyiya thaa'-ay thaw-thawantan, than wiyangan kuchek waap min kal-kalantan, nil yimanamana. Niy ngaantam-ngeey-ngeeyān work nil God.angan thee'-thee' niiyantana. Niy ulp-ulpanangan ke' ngaantam-ngeey-ngeeyān niiyantakamana. ⁴ In ke' yimanangan wunana: nil pamangan mee'-a, kon-a, tha' thakan kalan kemp nungantamangana. Than inangan workan iiy-iiyantana — nil mee' nungantamangana yipam aak thath-thathow, nil kon nungantamangana yipama wik ngeey-ngeeyow, an tha' nungantamangana yipam iiy-iiyow pal-puya. Thanana ma'-aath-aathwuntana. ⁵ Yaa, inaniya aak yimanangan wunana: ngamp puth pam wanch Christians anangan-a, ke' kemp thonam nungantang anman iiy-iiyanamp, Jesus.antangana. Ngampiya work iiy-iiyanamp nungant, ma'-aath-aathwunampa. ⁶ Ngampaniy work minam iiy-iiyāmpa, nil puth Ngeen-Wiy Min God.antamangan ngangk minangam work inangan thee'-thee' ngamparana. Than wiyanganiya wik

min God.antaman waa'-waa'antan ngamparana — yaa, thanan wik nungantaman waa'ayn ke' nilam God.angan want ngamparana. ⁷ Than wiyangana wiy anangan ma'-aath-aathantan thanang aak churchangan, pam wanch alpan thakan — yaa, thanana minam ma'-aath-aathayn thanangana; than wiyangana wik God.antaman koochanathantan thant, thanan min-minam thaa'-aath-aathayn thanangana! ⁸ Than pam wanch wiyangana ngangk thay-thayanathantan thanang wiy anangan Christ.an yipam monkan-wak-wakayn nunangana — thanana min-minam ngangk thay-thayanathayn thanangana. Than pam wanch wiyangan wukal thakan thee'-thee'antan wiyantana — an than ngangk minangam thee'-thee'ayn thantana! Than wiyiya ministers iyy-iyantana a' putha than wiyiya manth-thayan churchakan iyy-iyantana — puth thanana work minam anman iyy-iiyayn a! Than pam wanch wiyiya ngangk minangam iyy-iyantana thant ngangk way anangan iyy-iyantana — thanana ngangk min anman yump-yumpayn thanangan a!

⁹ Niiy kan-kanam paththam kaangk wun-wunān thanta pam wanch wiyantan, ngangk pal pekkuwamana. Niiy woyan wayakana man-mangkam thee'-thee'āna; niiy ke'-ngoongkam anman woyan min anman wak-wakān a! ¹⁰ Niiy kaangk wun-wunān niiyantakamana ke' niiy kuuncha kaath piip thonamam yimanangana; minam iyy-iiyān niiyantakamana, minam ngeey-ngeeywuna. ¹¹ Niiy moom ngamparamana Lord.an ngangk minangam ngeey-ngeeyān nunangana nil want-wanttakan thaw-thawow niiyantana a' niiy work ke'-ngoongkam iyy-iiyāna, ke' way-wayamāna. ¹² Ngangk minangam iyy-iiyāna, puth niiy kan mee'miy nil God.angan ngulana kalow niiyang aak umpuyangam nungantang wun-wunāna.

Aak waywey wampow niiyantana-a, niiyaniya ngangk thayanam iyy-iiyāna; puth inan thampa, niiy mee'-wuth-wuthanamān nungant God.antana. ¹³ Than Christians wiy anangan wukal ke'anangan wun-wunaynan-a, puth may ke'ananganwey-a, niiyiy-a, may-a, putha wukal thakana thee'-thee'ān thanta; than pam wanch Christians aak nathpalan wampaynwey-a, yaa, niiyana min-minam pi'-pi'ān thananga.

¹⁴ Than pam wanch anangan wayan iyy-iiyayn niiyantana-a, niiyana nungant God.antan mee'-wuthanamāna minam yipam pi'-pi'ow thananga, niiy ke' thawān nungantana wayathow thanangana, ya'a. ¹⁵ Than pam wanch ngangk minangamwey iyy-iiyaynan-a, niiyana ngangk minangam thamp iyy-iiyān thanttangana; puth than nath ngangk wayan wun-wunayn-a, peey-peeyaynwey-a, niiyan thaa'-wakān thanang niiy thampana peeyān. ¹⁶ Ngangk minangam iyy-iiyān niiyantakamana, minam thak pi'-pi'wun, wik ulp-ulpanangan ke' thaw-thawāna, puth niiyan-a, ngurp min yumpwuna thanang anangan pam wanch yuk way min ke'anangana. Niiy work pi'anakan ke' wenk-wenkāna pam wanch pi'an yipam waa'-waa'ayn niiyang, an ya'a, niiy ke' ngaantam-ngeey-ngeeyān niiyantakamana niiy ke' pam pi'an yimanangana, an ya'a.

¹⁷ Nil wee'ang wayan yump-yumpow niiyantanywey-a, niiy puthangkan way nungantan ke' yumpāna; puth min anman iyy-iiyān than wiyangan yipam min waa'-waa'ayn niiyanga. ¹⁸ Niiy ngangk minangam paththam iyy-iiyān pam wanch wiyantana, niiy ke' kul uw-uwān thant aak-ya'angana. ¹⁹ Than wiyangan way yumpayn niiyantanywey-a, niiy puthangkan way ke' yumpān thant, puth in ngeeyān a! An nilaman ep God.angana ngul wayathow thanang, aak nung-nungant wunana, an ngam-

par ya'a. Puth wik inangan lat ngench thayanangan waa'-waa'an nil God.an thawa, "An ngath-ngatha ngay wayathāng thanang pam wanch anangan wayan yump-yumpantana, ngay aak wayakan ngul kuchāng thanang." ²⁰ Wik inangan lat ngench thayanangan waa'an thampa; "Nil pam thonaman nath ngangk kulangam iyy-iyyiy niyantana — nil nathwey meeche iyy-iyyiwey-a, niyyiya putha may aath-aathān nunang; nil ngakamwey uth-uthamiywey-a, niyaniya ngak thee'ān nungantweya; amanaman-a, nilan putha ngul-nyaa' ngul wun-wunowweya nil puth ka'athamana way-wayam yump niyantana." ²¹ Than pam wanch wiyangan natha way yumpiythan niyantanywey-a, niyana way ke' yump-yumpān thanta; min anman iyy-iyyān thantana.

13

Ngamp Pam Pi'an Anangan Wik Ngeey-Ngeeyāmp Thananga

¹ Ngay wik inan thawāng niyanta: ngamp pam wanch yotamangan pam pi'an anangan wik ngeey-ngeeyāmp thananga, puth nil God.angan work inangan thee'-thee' thant moom pi'an iyy-iyyayna. Nil work inangan ke'wey thee'iy thantan-a, thanana moom pi'-pi'anam ke' iyy-iyyiythan, ya'a. ² Than pam wanchanganweya pam pi'-pi'anam anangan thaampantan thanangan-a, an ke' than God.an thaamp-thaampantan nunang, puth nilam work inangan thee'-thee' thantana, moom al-alantana. Pam wanch anangan-a, than moom al-alangana ngul way-wayathayn thanangana. ³ Pam wanch minwey iyy-iyyiythan-a, an than ke' winyngyang mo'-mo'iythan thant-taman pam pi'-pi'anam al-alantamana. Puth than nathwey wik thayan anangan pip-pipaynan-a, moom pi'-pi'anam al-alantaman-a, an than winyngyangwey mo'-

mo'ayn thanttamana. Niiywey kaangk ke'ana winyonyang mo'ānana thanttaman-a, niiyana minam iyy-iiyāna, a' thananiya ngul thaa'-kuump-kuumpayn niiyanga. ⁴ Nil puth God.angan work inangan thee'-thee' thanta than yipam ma'-aath-aathayn niiyanga. Niiy puth way nath yump-yumpinwey-a, an niiyaniy winyonyang mo'ān thanttam, putha thananiya pam pi'-pi'anam paththam iyy-iiyantana a' thanana wayathayn niiyang, nil puth God.angan work inan thee' thantana.

⁵⁻⁶ Yaa, niiy moom pi'-pi'anamana wik ngeey-ngeeyān thanang a' niiy thampa wukal tax amanamana payimpungān thananga. Ngeenam puth a? Nil God.an ke' yipam man kulan wampow niiyant nil puth work inangan nilam thee'-thee' thanta. A' inan thampa, niiy kan mee'miy an min niiyanta wikan ngeey-ngeeyān thanangana. ⁷ Niiyan puth minam iyy-iiyān thanta. Thanwey thawayn niyantana wukal rent anpalan-a, a' wukal tax anpalana payimpungānan-a, niiyaniya thee'ān thanta. A' niiy wik min-minam thawān thant, puth than moom pi'ana.

Ngamp Kaangk Paththam Wun-Wunāmp Thant Pam Wanchantana

⁸ Nath wee'-wee'ananganwey loan thee'iythan niiyantana-a, niiyanganiya ke' kon-ngathow, niiy puthangkana koyamana thee'ān thant. Thon ina, ke' kon-ngathow ngampangana; ngamp kaangk wun-wunāmp thanta pam wanchant, ngampa murkanam anman kaangk wun-wunāmp thantana, ngampaniya ke' eench-eechāmp thanttama. Than wee'-wee'anangana wiyantan kaangk wun-wuntana-a, an than kan-kanam wik thayan God.antaman ngeey-ngeeyantan. ⁹ Wik thayan inan God.antam, “Niiy paththam kaangk wunān pam wanch puk wiyantan. Ke' niiyan min-minam pi'-pi'wuniy niiyantakaman-a, yaa, niiyiya yimanangan pam wanch

wiy al-alantan ngangk minangam iyy-iiyān thant.” Niiy wik thayan inan kan-kanaman pi'-pi'ānan-a, yaa, an ke' niiy wik thayan ma'mangkam God.antaman pi'-pi'aniy — wik inangana, “Niiy maarichana ke' kee'āna, niiy pam wanch wiy anangana ke' mul-mulathān thananga; niiy yuk way min wiyantamana ke' ma'-kuchathāna; niiy wiyantana ke' mee'-wun-wunān thantweya,” a' wiy thamp wik thayan God.antamana umpina. ¹⁰ Niiy thant wiyantan kaangkan wun-wuninwey-a, puth niiyana wayan ke' yump-yumpān thantana, ya'a. Niiy thant wiyant kan-kanamwey kaangk wuninwey-a, an niiy kan-kanama wik thayan God.antaman ngeey-ngeeyaniya.

¹¹ Niiy minam iyy-iiyān puth niiy mee'miy aakan thinth kan-ngul wamp-wampana nil Lord ngamparaman palaman wampow aak iikanakana. Ngamp ka'athaman ngangkan thee'amp nungant Jesus Christ.antan-a, aakan yippak chil kech wun-wun nungantan nil palaman wampowana. A' aakan kan wamp niiyant niiy work pi'-pi'anam anangan iyy-iiyān nungant God.antana, niiy ma'minaman ke' iyy-iiyāna, work ke'anangan a! ¹² Aakan kanan pachamow-a, ngampana mee'miy ngula ngaa'an ya'-ngul wunow, kinch ngulan pentowa. Aak inana ngamp in wunanamp-a, an ke' aak ngaa' wunan ngampar puth pam wanchangan way anman yump-yumpantan. In yaam ke'anama nil palam putham ngul wampow Christ.ana. Ngamp puth way anangan kan wantāmpa! A' ngamp God.an ngangk thayanam ngangkangam pi'-pi'āmp nunang, a' minam iyy-iiyāmp, oony wayana um thaamp-thaampāmp nunanga ke' soldiers yimanangana. ¹³ Than pam wanch wiyangan aak ngutangan way yump-yumpantan than wiyangan ke' yipam thath-thathayn thanang. Niiyiya ma'-yotama min anman iyy-iiyāna, niiyana ke' aak kinchang iyy-iiyāna, mee' yotantangana.

Niiy ngak way mungkinan-a, ke' iiy-iiyāna; a' putha kulliy ke' weenāna, niiy maarich ke' kee'-kee'ān; niiy wik thayanang ke' wak-wakwun niiyantakamana a' puth niiy ke' mee'-wun-wunān wiyantana. ¹⁴ Niiyiya ke' Jesus anman iiy-iiyān. Niiy way anangan ke'a ngaantam-ngeey-ngeeyān yumpanakana. Niiy yimanangan iiy-iiyān ke' nil anman Jesus.an iiy-iiy.

14

Niiy Aak-Ya'ang Ke' Waa'-Waa'ān Thanang Christians Wiy Anangan

¹⁻³ Christians wiy anangana thawantan thanttakamana may-a, minha ma'mangkam anangan min mungkanakana; puth Christians puungk wiy anangan thawantan thanttakamana ngamp may anman mungkāmpa, puth minhana ke' mungkāmpa, thanan puth kan ngaantam-ngeeyin thanttakaman nil God.angan kaangk ke' pam wanch nungantam al-alangan minhan mungkayn minh than wiy al-alangan kanaman thee'-thee'in gods thanttamakan. Puth niiy Christians yotamangana karpam ngangk min anman iiy-iiyān, ke' waa'-waa'wunweya. Niiy wiyangan nath ngaantam-ngeey-ngeeyaniy niiyantakam minh anangan min mungkanakan-a, yaa, niiyiy puth aak-ya'ang ke' waa'-waa'ān thanang Christians wiy anangan than minhan ke'an mungkantana. Puth niiy wiyangan minhan ke'an mungkaniy-a, niiy puth ke' waa'-waa'ān thanang aak-ya'ang Christians wiy anangan minhan mungkantana. An ya'a, puth nil God.an thawa niiy Christians ma'mangkam anangan-a, puk nungantama. Than Christians wiy al-alangan minam ke'am ngaantam-ngeey-ngeeyantan thanttakaman woyan God.antaman want-wanttakan wun-wunan thantana — niiy ke'wey wakān thanang

a' putha ke' kenthān thanang, puth niiyiya karpam ngangk minangam iyy-iiyāna. ⁴ Puth than ananganiya, pam wanch God.antaman iyy-iiyantana, nilan ep moom thanntama, niiyiya ya'a. Niiyiy putha ke' waa'ān thanang, aak-ya'angan thaka, nil puth God.angan ngangk thath-thathan thanntamana than nath way iyy-iiyantana, nath min iyy-iiyantana, nilam thiichan. Nilam ma' minangam ngul pi'-pi'ow thananga, thanan yipam woyan God.antaman min-minam wak-wakayn.

⁵ Christians wiy anangan thawantana, “Aak kinch wiyiya ke' ngench thayan wunan ngampar, ngamp yipama ngaantam-ngeeyāmp nunang God.ana, a' putha work iyy-iiyāmpanta.” Puth puungk wiy thaw-thawantana, “An yimanangan ya'a. Aak ngaa' thon-thonangan, an min paththam wunan ngampar mee' God.antangana.” Puth ngamp pok-pokkapanga ngaantam-ngeeyāmp kuchek ngamparamanga ngamp woyan want-wanttinan wak-wakāmpa. ⁶ Pam wanch Christians wiy al-alangan ngaantam-ngeeyantana thanntakaman aak kinch wiy anangan ke' ngench thayan God.antana, thanana ke' God.an ngangk min yumpiythan nunanga. Pam wanch wiyangiy ngaantam-ngeeyantana nil God.angan may minh anangan yot thee'-thee'an mungkanakan, amanamana than mungkantana, a' thankyou thawantana nungant God.antana. Puth pam wanch puungk wiyanganiya minhan ke' mungkantana puth thananiya ngaantam-ngeey-ngeeyantana nil God.ana kaangk ke' thathow ngampang minhan mungkmungkāmp, thanan thampa thankyou thaw-thawantana God.antana. ⁷⁻⁸ Ngamp Christians yotam anangana, ngamp moom ngamparakamana ya'a, nil God.ana moom pi'an ngamparamana. Ngampwey nath man-yetham iyy-iiyimpwey-a, nath mulwey wunimpa, ngampaniya ma'

nungantang anman iiy-iiyāmp, a' putha ngampiya God anman wik ngeey-ngeeyāmp nunang, puth ngampaniya pam wanch nungantama. ⁹ Nil puth Jesus.an uthama, a' mulamana koyam eka, nil yipam ma' nungantang pi'-pi'ow ngampanga. Nungkway ngamp man-yethama iiy-iiyimp-a, nath mul wunimp-a, an ngampaniya ma' nungantang Jesus.antang iiy-iiyāmpa.

¹⁰ Niiy wiy il-ilangan ngeenak waa'aniy thanang Christians wiy anangan wayan yump-yumpantan a? A' putha niiy ngeenak waa'-waa'aniy thanang ke' pam wanch wayanang iiy-iiyantana e? Nil thonam anman Goda ep thawow ngampar ngamp nath way yump-yumpanamp mee' nungantangan, nath ya'a, nath min yumpanamp, puth aakan ngul wampow ngampar ngamp pam wanch yotamana um nungantangan God.antang than-thanāmpa.

¹¹ Nil piip God.an thaw lat ngench thayanangana:

“Ngay God inman kan-kanam waa'-waa'ang niiyanta:
Aak ngulan wampowa pam wanch yot thaa'-
wantanamana pungkang thuchayna um
ngatharang
a' thawayn ngathar ngay kan-kanam paththam Goda,
moom wuut pi'anana,
a' than ma'mangkamangana thaa'-kuump-kuumpayn
ngayang.”

¹² Ngampaniy putha pam wanch ma'mangkamana wik waa'-waa'āmp nungant God.antan ngamp ngeen thakan yump-yumpampa a' puth ngeen thakan ngaantam-ngeey-ngeeyamp kuchek ngamparamangan thampa.

Niiy Christians Wiy Anangan Ke' Wayathān Thanang, Thananiy Putha, Woyan Christ.antam Ke'-Ngul Wakiythan

¹³ Ngampaniya, ke' waa'-waa'wump aak-ya'angan thaka. Ngampaniya ma'-aath-aathāmp thanang Christians wiy anangan than yipam minam iiy-iiyayna.

Than pam wanch wiyangana nath ngaantam-ngeeyiythan thanttakamana ke' ngampan way yump-yumpanampa, than woyan ngamparamana nath wak-wakiythana. Ngamp ke' thaach-thaachāmp thananga wayan yump-yumpayna. ¹⁴ Ngay Jesus.an ngaantam-ngeey-ngeeyang nunanga, yaa, ngay puth mee'miy ngula kuchek ngatharamangana, maya minh ma'mangkamana, an kan-kanam min ngampar mungkanakana, way ya'a. Puth pam wanch wiyangan nath ngaantam-ngeeyiythan minhan ke' ngench thayan wun-wun thantana, ke'-paal thanan ke' mungkiythan, an puth way thant than mungkiythanana. ¹⁵ Niiywey minh anangan mungkinwey-a, than Christians wiy anangan nath ngangk way iiyiythana thanan putha ngaantam-ngeeyiythan thanttakamana an minhan ngencha, an ke' niiyan way yump-yumpaniya. Niiywey natha ngangk way yump-yumpaniy thanang-a, niiy min ke'am iiy-iiyaniy thantana. Niiy nathwey minh anman mungk-mungkinan-a, niiy nath wayathin thanang, wiy anangan, thananiy putha, woyan Christ.antam ke'-ngul wak-wakiythana. Niiy ke' wayathān thanang, an puth nil Christ.ana an thant thamp uthama. ¹⁶ Nungkway niiy kan mee'miy minh anangana an minwey ngampar mungkanakan-a, than wiy nathwey thawiythan ke' niiy wayan iiy-iiyaniy-a, yaa, niiyiy putha, ke' mungkān minhana. ¹⁷ Nil God.ana moom pi'an ngamparama, ngampiya ma' nungantang iiy-iyanamp, ngampiya ma'-yotam ke' ngaantam-ngeey-ngeeyāmp may minh anangan mungkanampa. Ngamp inan ep ngaantam-ngeey-ngeeyāmpa: ngamp minam iiy-iiyāmp mee' God.antangana, a' putha ngangk minangam wun-wunāmp ngamparakamana, a' ngangk minangam iiy-iiyāmp puth Ngeen-Wiy Min God.antamana ngangk ngamparangan wun-wunan. ¹⁸ Nil wee'an nathweya min

yimanangan iyy-iiyow-a, Jesus.an minam monkan-wak-wakow nunang-a, nil God.ana ngangk min yump-yumpan nunang a' putha pam wanch wiyangana thath-thathantan nunang nil pam mina.

¹⁹ Yaa, ngamp kan-ngul min anman iyy-iiyāmpa, murkanama, ngamp yipam man um enyanam wun-wunāmp ngamparakamana a' putha ma'-aath-aathwump ngamparakamana monkan-wakāmp nunangana Jesus Christ.ana. ²⁰ An kan-kanama may minh ma'mangkamana an min ngampar mungkanakana. Puth than Christians wiy al-alangana thath-thathayn niiyangan minhan mungkānan-a, an thananiya ngangk way nath iyy-iiyiythana, a' amanamaniya, thananiya nath way ngul yump-yumpiythan. Niiy puth ke' wayathān thanang. An way paththama, puth niiyaniy minam ke'am ma'-aath-aathaniy thanang monkan-wak-wakayn nunang Jesus.ana. ²¹ Yaa, an puth min ngampar minhan wantāmpa, ke'-ngul mungkāmp, a' putha ngak way thampana ke' mungkāmpa, than pam wanch Christians wiy anangan ke' yipam ngangk wayan iyy-iiyayn ngamparamana, a' ke' yipam wayan yumpayna. ²² Niiy ngeen nathan ngaantam-ngeeyaniya minh nathan ngampar min mungkanakana, nath ya'wey-a, niiyiya God.ant thonakam waa'ān, a' ngangk niiyantamang nangman pi'-pi'āna. Niiy nathwey kan-kanaman mee'miya niiy minaman ngaantam-ngeey-ngeeyaniy-a, ke'aman muukamaniy-a, niiyiya ngangk minangam ngul iyy-iiyān. ²³ Puth pam wanch wiy anangan kuchekangan wik pal-puy ngaantam-ngeeyantan, than thawantan, “An nathwey min ngampar minhan mungkāmpana, nath ya'a, minh nath ke' mungkimpa.” Than mungkiythanana-a, yaa, an than way yumpan-tan, an puth thanan kan-kanamana ke'am ngaantam-ngeeyantan minh anangana an min mungkanakan ngam-

para. Ngamp ke' nath mee'miy ngamp minh nath mungkāmp-a, nath ya'wey-a, yaa, ngampana putha min-haniya ke' mungkāmpa, an way ngampar.

15

Ngamp Ngamparakamana Thonakama Ke' Ngaantam-Ngeeyāmp Ya'a

¹ Ngamp wee'-wee'anangan kan-kanaman woyan God.antaman min-minaman wak-wakanamp-a, ngampiya, ma'-aath-aathāmp thanang Christians wiy anangan than anangan koyaman mel ench-enchantan, than ke' mich yippak iiy-iiyantanyweya. Ngamp ngamparakaman thonakam ke' ngaantam-ngeeywumpa ya'a. ² Puth ngampany wiy anangan ngaantam-ngeey-ngeeyāmp thanang thampa, than yipam ngangk thay-thayanam monkan-wak-wakayn nunang Jesus Christ.ana, a' putha woyan min God.antaman puy-puyam ngul wak-wakayn. ³ Puth nil Jesus Christ.angana ke'am ngaantam-ngeey-ngeey nungantakamana, ya'a. Nilan puth thawa lat ngench thayanangan, “Piip God-ang! Pam wanch wiy anangana kaangk ke' nungkarama, anpalana than ngayang aak-ya'angan waa'-waa'ina, wayan yumpin ngathar.” ⁴ Wik ma'mangkamana, than lat ngench thayanangan umpin keenkanaman-a, aniy-a, min ngampara. Ngamp wik inangana ngeey-ngeeyāmpana, ngampan yipam ngangk thayanam ngul woyan anman wak-wakāmp God.antamana, puth amanamana ngampan mee'miy ngula nil piip God.angana ma'angam ngul pi'-pi'ow ngampang ngulakamana. ⁵ Ngampar way nathwey wampowwey-a, nil God alangaman ma'-aath-aathow ngampang Jesus Christ anman monkan-wak-wakāmp nunang, a' putha ngangk minangam iiy-iiyāmpa. Ngay kaangk nil Jesus Christ.angana ma'-aath-aathow niiyang

niiy yipam minam anman iiy-iiyān niyantakamana, ke' nil Jesus anman ngangk minangam iiy-iiy thon-thonantan, ⁶ niiyan yipam ke' thonam anman iiy-iiyāna, a' thaa'-kuump-kuumpān nunang God.an piip nungantamana, Jesus Christ.antaman, Lord ngamparam alantamana.

Nil God.angan Ngangk Mam-Mam Thanang Jews Ya' Anangan, Than Yipam Thaa'-Kuumpayn Nunang God.an

⁷ Niiy ke' wayathān thanang Christians wiy anangan, niiyiy paththama ngangk minangam iiy-iiyān thantan ke' nil Jesus.an ngangk minangam iiy-iiyan ngamparana. Amanamana, than pam wanch yotamangana ngaantam-ngeey-ngeeyayn ngula nil God.an min-minam paththama. ⁸⁻⁹ Nil puth Jesus Christ.ana wamp ngampar yipam woyan min meenathow ngampar yotamantana. Nil Jews al-alantan wampa than yipam ngaantam-ngeey-ngeeyayn wik nil God.an keenkanaman thaw wuut mangk thanttamakan-a, an kan-kanam ngul wamp. A' nilaniya, ngangk mam-mam thanang wiy anangana, than Jews ya' ananganweya, than yipam thaa'-kuump-kuumpayn nunang God.an. An puth lat ngench thayanangan waa'-waa'ana, wik inanganiya, nil Jesus Christ.an thaw piip-kunch God.antan:

“Ngay-a, putha pam wanch Jews ya' anangana, ngan karp anmana ngul thaa'-kuump-kuumpān nintang, aak-path-pathān nungkar puth nint min-minam paththama.”

¹⁰ Lat ngench thayanangan thamp waa'-waa'an:

“Niiy Jews ya' anangana, niiy ngangk minangam iiy-iiyān thanttang karpam Jews al-alantangan pam wanch God.antam anangana!”

¹¹ A' putha wik thonangan inana:

“Niiy ma'mangkam Jews ya' anangana,

niiy aak-path-pathān nungant God.antan a! Thaa'-
 kuump-kuumpān nunanga!
 Ngamp ma'mangkamangana thaa'-kuump-
 kuumpāmpana!”

¹² Inan Isaiah thamp keenkanaman thawa:

“Nil pam ngulan wampowa, wuut mangk amanamana
 Jesse.antamana.

Nilaniya moom pi'an iyy-iiyow thant Jews ya' al-alantan,
 an puth thanana kan-kanam ngul ngaantam-ngeey-
 ngeeyayn nunang nilana kaa'-piichanathow
 thanangana.”

¹³ Nil God.angana ma'-aath-aathan ngampang
 ngamp yipam kan-kanam ngaantam-ngeey-ngeeyāmp
 nunangana Jesus.ana nilan kaa'-piichanathow
 ngampanga. Ngay kaangk nil God.angan ngangk
 min yumpow niiyang, ngangk winy-winynyangan
 ya'a, niiywey nunang anman ngangkangan pi'-pi'āna.
 Amanamana, nil Ngeen-Wiy Min God.antam alangan
 ngul ma'-aath-aathow niiyang, mee'miy yump-yumpow
 niiyanga, niiy ngulana aak God.antang ngul wun-wunāna
 aak umpuyangamana.

*Ngay Wik Thayan Kanam Umpang Niiyant Niiy Yipam Wik
 Anangana Kuchekangan Pi'-Pi'ān Thanang*

¹⁴ Niiyalang, ngay ngaantam-ngeeyang niiyang
 niiy min iyy-iiyaniy, niiyana mee'miy ngul woyan
 min God.antamana wak-wakaniy, a' putha niiy
 mee'miy thaa'-aath-aathān thanang wiy anangan
 wik min God.antamana. ¹⁵⁻¹⁶ Puth ngay wik thayan
 kanam umpang niiyantana, niiy yipam wik anangana
 kuchekangam pi'-pi'ān thanang, nil God.angan puth
 work inangan thee'ar Jesus.antaman waa'-waa'ānga.
 Ngay wik waa'-waa'ang pam wanch Jews ya' al-alantan
 thanta, than yipam ngangk thee'ayn nunganta. An

ke' ngayana ma'angam wamp-wampathang thanang God.antan than yipam ma' nungantang iyy-iiyayn. Nilana ngangk min wun-wunow thanttam, puth nil Ngeen-Wiy Min God.antamana ngangk thanttamangan wun-wunan, ma'-aath-aathan thanang than yipam puk God.antam ngul iyy-iiyayn.

¹⁷ Ngay inan thawang niiyanta, ngay work minam iyy-iiyang nungant God.antan, ngay puth ngay-ngayamana ke' work iyy-iiyang pokkapangana, ya'a, ngan Jesus Christ.angan-a, karpam work iyy-iiyanan. ¹⁸⁻¹⁹ Nil Jesus Christ alangan ma'-aath-aathan ngayang yipam than Jews ya' anangan ngangk thee'-thee'ayn nungant, Jesus.antan. Ngay kaangk wik anman waa'-waa'ang nungantam Jesus Christ.antamana, nilan putha Ngeen-Wiy Min nungantaman kuch nil yipam ma'-aath-aathow ngayangana minam yipam waa'-waa'ang thant, a' minam iyy-iiyāng a' putha work pi'-pi'anam anangan meen-meenthāng thanta. Ngayana wik min God.antaman waa'-waa'ang aak thon-thonangana, aak kecham puth iyy-iiyanga Jerusalem anpalana aak-aakanakaman Illyricum aakanakan. ²⁰ Ngay ke'am iyy-iiyang aak-aakanakana than pam wiyangan ka'athaman wik God.antaman kanaman waa'-waa'in thantana, ya'a. Ngay puth kaangk wik minan waa'-waa'ang pam wanchantan than ke'am yippakan wik God.antaman ngeey-ngeeyina al-alantanweya. ²¹ Puth than keenkanamana lat ngench thayanangan umpin: “Pam wanch wiyanganiya ke'am yippak wik God.antaman ngeeyina,
 puth ngul-ngulana an ep than ngul ngeey-ngeeyayn wik min nungantamana,
 a' min-minam ngul ngaantam-ngeey-ngeeyayn nunang.”

Ngay Kaangk Wampāng Niiyant Aak Rome.akana

²²⁻²³ Puth ngay nathpalman kaangka thathāng niyyang, puth ngayiy-a, work ngatharaman iiy-iiyang, wik God.antaman yippak waa'-waa'ang thant aak thon-thonanganwey wun-wuntana. Ngay puth kanam iiy-iiyangan thantanweya, workana angman minchathangan. ²⁴ Ngayaniya aak Spain.akan ngul iiyānga, puth ngay kaangk woyan iiyananganweya ngul thathāng niyyang. A' ngay yaan wunāng niyantanga, ngampaniya ngangk minangam karpam ngul wun-wunāmpa, a' anpalan-a, niyana ma'-aath-aathān ngayang ngay yipam aak Spain.akan ngul iiyānga. ²⁵ Puth ya' yippakweya, ngay inana kan-ngul iiyāng aak Jerusalem.akana, ngay yipam wukal kalāng thantwey pam wanch Jews Christians al-alantana. ²⁶ Puth than Christians aak Macedonia.angan wun-wuntan-a, puth aak Greece.angan wun-wuntana, than wukalwey thee'in ngathar ngay yipam kalāng wukal anangan thantweya pam wanch Christians wukal ke'anang al-alantan aak Jerusalem.angana. ²⁷ Than ngangk minangam wik yump-yumpin wukalan kuchayn thantana. An puth min thantana, thanan ma'-aath-aathayn thanang, puth wik min Jesus Christ.antamana ka'athamana Jews al-alantaman wampa, puth amanamana than waa'-waa'in pam wanch Jews ya' al-alantan ngula. Yaa, puth yimanang ngulana, pam wanch Jews ya' il-ilangana koyaman ma'-aath-aathayn thanang Jews anangan a' putha wukal-a, may thakan kuchayn thantweya. ²⁸ Ngay kanan wampāng thant Jerusalem.angan-a, ngayaniya wukal anangan thee'āng thant, amanamaniya ngay kan-ngul iiyāng aak niyantamak, anpalanwey-a, ngay kan-ngul iiyāng aak Spain.aka. ²⁹ Ngay nang ngulan wampāng niyant-a, ngay mee'miy paththama nil Christ alangan ngangk min paththam yump-yumpow ngampanga.

³⁰ Niiyalang, ngurp ngatharam-ang, ngay inan thawang niiyant: niiywey ngatharana murkanam mee'-wuth-wuthanamān God.antan, ngangkaman thawāna, niiyi putha kaangk wun-wunaniy Lord ngamparamant Jesus Christ.antana, a' ngampiy putha kaangk wun-wunanamp ngamparakamana puth nil Ngeen-Wiy Min God.antamana ngangk ngamparamangan wun-wunan.

³¹ Niiy God.antan thawāna ngayan yipama minam wun-wunāng aak Judea.angan, than pam wanch Christians ya' al-alangana ke' yipmam mulathayn ngayanga. A' putha, niiy God.antan thawān thamp than pam wanch Christians aak Jerusalem.angan wun-wuntan-a, wukalan ngangk minangam uwayna. ³² Nil God.angan nath kaangkwey kuchow ngayang niiyant-an-a, ngay ngangk minangam ngul wampāng niiyanta, niiyi putha, ngangk min ngul yumpān ngayangweya, putha ngangk thay-thayanathān ngayang thampa. ³³ Ngay kaangka nil God.ana min iiy-iiyow niiyanta — nilam thonamang ngangk min yump-yump-an ngampanga — an kan-kanam paththam a!

16

Niiy Wik Waa'ān Thanta Ngay Pam Wanch Nanangan Ngaantam-Ngeey-Ngeeyang Thanang

¹ Nil Phoebe.ana nan wampow niiyant, nil wanch kuunch ngamparama Jesus Christ.antanga. Nil wanch ilangamana, ma'-aath-aathan thanang Christians anangan aak Cenchrea.angan wun-wuntan, an puth work nunganta. ² Niiyiya ngangk minangam umang wakān nunangweya puth niiya pam wanch God.antama, niiy kaangk paththam wunaniya Jesus Christ.antana. Nil Phoebe.an wanttakan thawow niiyant-an-a, niiyiya putha ma'-aath-aathān nunang minamwey, puth

nilana ka'athamana ma'-aath-aatha ngampangan yotam inangamana.

³ Nint waa'ān ngayang pam wanch il-ilantan ngay kaangk paththam wun-wunang thanta, puth in-inman ngay ngaantam-ngeey-ngeeyang thananga:

— Priscilla a' putha Aquila, pul karpan work iyy-iypul ngatharangana, ngana wik Jesus.antaman waa'-waa'an.

⁴ Pulana minam pi'-pi'pul ngayangana, pam wayanang al-alantamana. Nungkway than ke' mulathiythan pulangan thamp-a, an kana, pul ngayangiyweya minam pi'-pi'pula. Yaa, an ngayiy putha thankyou thawang pulanta, puth ngayam thonakam ya'a, puth wiy anangan thamp, pam wanch Christiansa, Jews ya' anangana, than yotaman thamp thankyou thaw-thawantan pulantana.

⁵ Nint ngayangan waa'āna pam wanch wiy al-alantan thampa:

— than pam wanch Christians anangana aawuch pulantamangana yal-yalmathwuntan God.antan mee'an-wuth-wuthanamantana,

— puth ngurp min ngatharam Epaenetus.ana, nil pam inmana pam Christian ka'atham iyy-iyya aak anganiy Asia.angana,

⁶ — putha, Mary.anweya, work pi'anana iyy-iyy ke'-ngoongkamana niyantana,

⁷ — putha Andronicus-a, a' putha Janias, puliya Jewsa ke' ngay inmana, pul aak jailangan wun-wunpul ngatharang angmana. Pam wanch wiy Christians al-alangana wik min anman waa'-waa'antan pulantamaniya. Pulaniya, ngangk ka'athangaman thee'pul God.antana, ngay ke'aman yippak ngangk ngatharaman thee'ang God.antana,

⁸ — putha, Ampliatus.ana, ngurp min ngatharam thampa nilan ngangkangan pi'-pi'an nunang Jesus Christ.ana ke' ngay anmana,

⁹ — putha Urbanus.ana, nilana work anman iiy-iiy ngamparangana nungant Jesus Christ.antan a' putha ngurp ngatharaman Stachys.ana,

¹⁰ — putha Apellesa, wiyiy aak way kuyam wamp nunganta, puth nilana Jesus.an ngangk thayanam ngul monkan-wak-wakan nunang,

— putha, than pam wanch anangan aawuch Aristobulus.antangan wun-wuntana,

¹¹ — putha Herodian.ana, pam ngan aak-kunchana,

— putha than Christians anangan aawuch Narcissus.antangan wun-wuntan thampa,

¹² — putha Tryphaena a' Tryphosa, pulana work iiy-iiyanpul thamp Lord Jesus.antana,

— putha ngurp ngatharam Persis.ana, nil thampana work pi'anana iiy-iiy nungant Lord.antana,

¹³ — a' puth Rufus.ana, nilana min-minam monkan-wak-wakan nunang Christ.ana, putha, kaath nungantaman thampa. Nilan ngayang minam pi'-pi'a ngay ke' puk nungantam yimanangana,

¹⁴ — putha, Assyncritus a' Phlegon a' Hermes a' Patrobus a' Hermas a' putha pam Christians wiy anangan thamp thanan yalmathwuntan thanttangana,

¹⁵ — putha Philologus, a' Julia a' Nereus a' puth kuunch nungantama a' Olympas a' putha Christians wiy anangan thamp than yalmathwuntan aak thanttangan.

¹⁶ Niiy karpan yalmathwuniy-a, niiy ma' thuthwuna. Than pam wanch Christians aak nath-nathan wun-wuntan-a, than wik kuchin niiyantantweya than ngaantam-ngeey-ngeeyantan niiyanga.

Ngay Inan Wik Thayanam Thawāng Niiyanta

¹⁷ Niiyalang, ngay wik inan thaa'-thayanam thawāng niiyanta: niyy aak thathāna than pam wanch nananga than puth kaangka kulan uw-uwayna wik min Christ.antam anpalana, thanan puth kaangk thaachayn niyyang niyy yipam wik min Jesus.antamana too wantāna, wik nganan thaa'-aath-aathan niyyanga. Niiyan putha ke' iyy-iyyān thanttangan ya'a, ¹⁸ puth thananiya ke' wik ngeey-ngeeyantan nunang, Christ.an, Lord ngamparamana, ya'a, thananiya kaangka moom thanttakam iyy-iyyayna, way thakan kaangk yump-yumpayn. Puth than kaangk muukamathayn pam wanch wiy anangan than yippak woyan min God.antaman ke'am min-minan thiichina, puth thananiya ke' wik min yimanang thaw-thawantana, an ya'a, an yaan muukamantana. ¹⁹ Puth niyyanganiya, pam wanch yotangan waa'-waa'antan niyyanga niyy wik God.antaman min-minam ngeey-ngeeyaniyweya. Ngangk ngatharaman-a, min paththam wun-wunan niyyantamana. Ngay kaangk niyyana kuchek minang iyy-iyyāna, niyy yipam minam anman iyy-iyyān. Puth pam wanch wiy al-alangan ke' thaachayn niyyang way yumpanakana, niyy ke'-ngoongkam anman minam iyy-iyyāna. ²⁰ An nil God.angan ep-paththam ma'-aath-aathan ngampangana ke'-paal ngangk minangam iyy-iyyāmp ngamparakamana. Nil paththam ma'-aath-aathow niyyang niyy yipam oony way pi'anana um thaamp-thaampān nunanga, ke' niyy tha'ang yimanangan maak-maakaniy nunangana. Ngay kaangk nil Lord Jesus Christ.ana minam iyy-iyyow niyyanta putha ma'-aath-aathow niyyang thampa.

²¹ Nil Timothy inana, nil work ngatharangan iyy-iyyana, nil wik kuch niyyanta nil ngaantam-ngeey-ngeeyan niyyang thampa, a' putha Luciusa, a' Jason a'

putha Sosipatera than ngaantam-ngeey-ngeeyantan niyang thampa — thaniya pam Jews ke' ngay inman. ²² Ngay thampa Tertius, ngay ngaantam-ngeey-ngeeyang niyang. Ngay lat inan umpang Paul.anta. Ngay thampa kanam ngangkan thee'angant Jesus Christ.antana. ²³ Nil in thamp Gaius.ang ngaantam-ngeey-ngeeyan niyanga. Ngaiya aawuch in wun-wunang nungantanga. Than Christians inangan karpam yalmathwuntan aawuch ingana than yipam ngaantam-ngeey-ngeeyayn nunang God.ana putha karpam mee'-wuth-wuthanamayna. Putha, nil Erastusa, nilan wukal pi'-pi'an aak town ingana, nil thampa ngaantam-ngeey-ngeeyan niyangweya. Putha pam Quartus ilangan ngaantam-ngeey-ngeeyan niyangweya, nilaniya ke' kuunch ngamparweya Jesus Christ.antangana. ²⁴ Ngay कांग्क nil Lord Jesus Christ.ana minam iyy-iiyow niyanta putha ma'-aath-aathow niyang thampa.

Ngamp God.an Ke'-Ngoongkam Anman Thaa'-Kuump-Kuumpāmp Nunanga!

²⁵ Ngamp piip God.ana thaa'-kuump-kuumpāmp nunang a! Nil ilangaman God.angana ep-paththam ngangk thay-thayanathan ngampang ngamp yipam Jesus Christ.an ngangkangam pi'-pi'āmp nunang — nil Christ inmana ngayan waa'-waa'ang niyanta, niy puth wik nungantamana mee'miy ngula. Pam wanch keenkan wun-wunin-a, than ke' mee'miy nunang Jesus Christ.ana, ya'a, nil puth piip God.angana wik inana ma'-mupam pi'-pi' nungantakama. ²⁶ Pam prophetsangan keenkana, wikan kan-ngul many-many waa'-waa'in pam wanchantana, wik Jesus.antamana, puth Jesus.ana ngul-ngul wampa, a' nil God.angana mee' engkanang ngul meenath ngamparana yipam than pam wanch aak

umyompanaman wun-wuntana min-minam thiichayn nunanga. Nil God inmana nil ke' uthamiya, nilan thawa ngamp wik Jesus.antaman waa'-waa'āmp thant pam wanch yotamantan than yipam ngangk thee'-thee'ayn nunganta, a' putha woyan nungantam anman yipam wak-wakayn ngula.

²⁷ Nil anman God thonama, nilam thonakam ma'-mangkaman mee'miya! Niliya Jesus.an kuch ngampara, puth ngampaniya ke'-ngoongkam anman thaa'-kuump-kuumpāmp nunang, yey, kan-kanamaniya!

Yaa, lat inan kan-ngul mincha, appow,
Paul.

Wik Inangan Kan-Kanam God.antama
The New Testament in the Wik-Mungkan language of Cape York,
Australia

copyright © 1984 Wycliffe Bible Translators

Language: Wik-Mungkan

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

PDF generated using Haiola and XeLaTeX on 14 Jun 2022 from source files dated 28 May 2022

034de520-6788-5805-9b17-b658084b38e2